

NE DIMIINU DYÈBÈ
NEDIKWATÈ CIIBI CYÀ
MWENA LUKUNÀ WADI



Ndi, ànu bu pa ciibidilu, mufike díbà òmùwè ànyì àbìdì paanyimà pa díbà. Mpaasàtà kwimana kuulu, kwamba ne: “Mpindyewu, ndi muswè kunùleeja nwènu bónsò Mukalenge Branham udi mufike pashùshe ewu.” Èè, ndi ne bintu byàbúngì byà kwenza pa nàнку ntu—ntu mfika paanyimà pàà díbà ku misangu. Kàdi ewu musangu ncívwa ne mùshindù wa kucyèpuka to. Bívwa bwà mùdi kuulu ki cidi cyenzèje ewu musangu. Ndi mwà kuciimikila mùdi kuulu ne kubingilapù. Mwva ne cyà kuciladikija, Mwanèètù wa balùme Rose, ànu kakesè cyanààna. Wetwàwu, Mwanèètù wa bakàji Rose. Ne disànkà dyà kwikala mu dindà emu, ne Mwanèètù wa balùme Rose ne Mwanèètù wa bakàji Rose mwab’ewu, ne Mwanèètù Sharrit, ne bânà bèètù bààbúngì, nwènu bantu bímpè bàdi kuntwaku.

² Ndi ngumvwa bàmba, muntu kampànda ùngambila ne: “Pàtù mvùla ùlòka mu Phoenix, bantu bónsò bàtu ànu bàshàala mu bulaalu,” dishintuluka dyà mùshindù awu, nudi bamanyè’s. Dimwè dyà ku àdi panshì aa nempetè byàdidyà byà nciyi ntùùdila mushinga to. Bàdi bàngambila ne udi mwà kupeta byàdidyà byà kùyì utùùdila mushinga ditùkù dyònsò dìdì munya kawùyì úteema to. Nèncitàbàlèèle leelù ewu, bwà kabàfucisha bwà cyòci aci.

³ Mwva ngàakula makèèlèlè dilòlòlò, mu èkèleeziyà kampànda amu. Ncyà bushùwà ne ncyèna mvùluka dínà dyèndè to. Ne nàнку tuvwa ne cikondo cilenga be, dilòlòlò dishàale, ku masangisha kwaka. Ne kwàka kwà Mwanèètù Outlaw, ne ku Tempe kwàka, nènku tuvwa ànu tucipila mu cikondo cimpè mu bwobùmwe ebu. Nènku ndi mwindile ne myoyi kuulukuulu bwà kutwilangana ne bambi naanyì aba ku mpungilu, netwikale ànu ne díbà dyà kudyòlolakù, Mwanèètù wa balùme Rose, ne kuyiikilaku muntu ne mukwèndè. Nènku cyòci aci ki cindì mulwile, mbwà kubwela mu bwobùmwe. Nènku tuvwa ne. . . munkaci mwà kutàngila ndongamu wa díbà dyètù ne kupeta myaba yàbúngì. Kàdi mèmè kwela meeji ne ewu úvwa mpùngà munènanènàalè, Bwalu ndi mufika ku—ku ditwilangana ne bantu bashiilèshiiàngane, bwà kufika ku dimònanangana naabò ne kwakulakù.

⁴ Míngà misangu mu diyiiisha, mwambi yònsò ewu bàtu

bàmumvwa bibi, mu mùshindù kampànda anyi mu mùshindù kansanga. Misangu yàbùngì, bantu bàtu bàngata cintu kampànda cyùdì wamba ne mu mùshindù kampànda. . .Byòbì bitambe kuneemenena ndambù kùdìbo, dìbà adi nebàcyambe mùshindù awu. Ne pashìishe muntu udi ulonda ùcyàngata, cidi cyènda cìtamba kusendama ndambù. Dyà kàà leelù ewu anyi, cidi cipàtuka mu mpoko cyònsò nkòòng.

⁵ Pa nàнку—pa nàнку twètù, misangu yàbùngì, mu diyìisha, ntu ànu bu udi ucyòkesha màngumba ne malongolodi ne bikwàbò. Misangu mikwàbò, bantu bàtu bàmba dìbà adi ne: “Mwanèètù Branham ùdi ùlwishangana ne bulongolodi kampànda.” Aci’s ncyà mafi. Mémè ncyèna mbèngangana ne bulongolodi nànsha bùmwè to. Kàdi kùdi misangu yàbùngì yìdì bantu bèyemena bulongolodi abu, nudi bamòne’s, ne bàtèeka matèkemena ààbò wònsò pa cyòci aci pamutù pàà kuàtèeka pa Kilistò.

⁶ Mbaswè kumòna bùngì bwà bidimba bidìbo mwà kufikisha ku bwòbù bulongolodi abu. Mpindyewu, abi’s mbìmpè. Ntu ngèèla meeji ne bulongolodi bwònsò bùvwa ne cyà kupeta cidimba cyònsò cìdìbo mwà kupeta aci. Abi’s mbìmpè be. Kàdi dìbà dinùkaadi nufika ku dyangata bàdì kabàyi bakùdimune mucima ne kutèeka byàbùngì pa cyòci kutàmba kutuuta ntèndù pa Nyumà Mwimpe, bu mùvwà Mwanèètù wa balùme Rose wàmba kùkaadi katanci, ne bikwàbò, dìbà adi nudi nufikisha—nudi nufikisha bantu ku dyela meeji ne: “Twètù tudi bàà mu *eci*, ne tudi bàà mu *cyàcyà*.” Ndekeelu wa byònsò, twètù bònsò tudi bàà Nzambì. Nwamònu anyi?

⁷ Mpindyewu, bu mémè mwà kumòna muntu upweka ne musùlù mu bwàtù. . .Ne mémè ntu musòmbèle pabwìpì ne musùlù mu Indiana, Musùlù wà Ohio, ne ndi nsanganyibwa ànu lwà ku bisàbasabà. Mmwaba mutàmbe bubì, bisàbasabà abi, bwalu cidi cikusànkula ànu mpindyewu. Wèwè ànu mupicileku pa bisàbasabà abi, kakwèna bwàtù bùdì mwà kupicilapù to, bwalu cidi, cidi cimacisha màyi mu bondòke bwà mètres dikumi ne àsàtù anyi dikumi ne àsambòmbò, ne pashìishe dìbungì dinène dìdì dìbànda dyumukila mwinshì amu, dìdì dìtuuta ku lubwebwe, lubwebwe lwà panshì alu. Nènku ndi ncinka ne—ne—nsongo, nsongo mitòoke, yìdì yifùkuka màyi mwinshì mwà bisàbasabà mu butumbùke bwà mètres dikumi ne àsàtù, nwamònu’s, mwaba ùdiwu àdìtuuta panshì, àlukila kàbìdì muulu ne lubìlu lukole. Ne pashìishe àtùngunuka ànu ne kwenda kutwa tutungu mùshindù awu, bikabwela too ne mu lupòngò lule lwà mètres matwè ku dikumi ne mwandamukùlù anyi makumi àbìdì ne dìmwè. Nènku mwòmò amu ke mùdì dijìba dyà ncìmbà dìdì diànyùnguluja mùshindù ewu, ne diàpatula pambèlù ne àpwekela mu mùkìdì kampànda. Kakwèna ànu mùshindù wà kushààla ne mwoyi to, nudi numòna’s.

⁸ Muntu kampànda wàkafwà munwemu kùkaadi matùkù mwikale ne nkooci wa disungidiibwa pambidi. Bààkamòna ànu cintu aci pààkamatàye, mùshindù *awu*. [Mwanèètù Branham ùdi ùtuuta cishòndò—Muf.] Nànsha mene nkooci wa disungidiibwa awu, Nkwaka wa bukòlè awu e kumupulumuna kuya nendè ànu mu kandòndò. Ne kabààkamupeta nànsha. Kabààkamanya nànsha cyàkalwàye to. Wàkakàlama kuulu ku mbwembwe, anyi mwinshì amu, pàmwàpa mu ntàntà wa kilòmèètà umwe ne citùpà anyi yisatu mu cijèngù amu, mùshindù awu, ne kakùyì mùshindù wà kupàndukayè nànsha.

⁹ Nènku bu mèmè mwà kumòna muntu kampànda ùpweka ne musùlù mu kaabwàtù kakesè kàà kale, musòmbe mwaba awu munkaci mwà kubala, ùtùngunuka, pàanyi mbànga kumwela lubila lukolè ne: “Pàtukà mu bwàtù amwéééé. Bwàtù abu kabwàkukùmbàna bwà kucimuna mavwala awu to.” Mpindyewu, kí mbwà ne ndi ne cintu kampànda cìndi mfwila ne muntu awu to, nànsha mèmè mwinè mumwelè mbila mikolè ne mumwambe mèyi makolè àà bishi. Kí mbwena kwamba ne ndi ne bwalu kampànda ne muntu awu to. Ndi munanga muntu awu, kàdi ndi mumanyè ne ùdi ùpetakana ne njiwu. Kì cidi cìnsàka bwà mèmè kumwela lubilà lukolè. Bwalu kèna. . . Mbwalu ndi mumunange bulelèlè, ki—ki cidi cyènza ne mmwelè lubilà lukolè. Bu nciyi ncyùka to, mvwa mwà kwamba ne: “Èè, àye bilenga,” tùngunuka, nwamònu’s, bu nciyi mmucyùka to.

¹⁰ Kàdi cìndi ngàmabila bintu abi mbwalu ndi ne lukunukunu bwà Èkèleeziyà. Ndi—ndi ne lukunukunu bwà Èkèleeziyà wa Nzambì. Nènku ndi—ndi nkìna menemene bwà kuMumòna ànu ùshààla wa meeji à bulongolodi. Ndi mumanyè lwidì alu, ne awu ke mùshindù ùdi èkèleeziyà yònsò ewu mukabwelè mu mbwebwe, ànu mùshindù awu, ùpweka too ne ku lwidì lwà bulongolodi alu.

¹¹ Anji elàayi meeji bwà ditàbuluja dyà mu cikondo cyà beena Luther, tàngilàayi kwàkayàdi. Pàdidi ànu didikuma ku cyòci aci, kadyenà dibìikaku kàbidi nànsha. Ba-Luthériens kacya kabàtukù banji kwalukila to. Tàngilàayi ba-Méthodistes bàà Wesley, kacya kabàtukù banji kwalukila to. Tàngilàayi ba-Pèlerins de la Sainteté, ba-Nazaréens, bakwàbò bònsò abu, ba-Baptistes, ba-Presbytériens. Bàdi bàpeta ditàbuluja, ne pashiishe muntu kampànda ùjuuka ne bukòlè bwà Nzambì pa yèyè, ùbanga nkwaka mu Nyumà. Pashiishe pàdi ànu muntu awu mumane kuya, dîbà adi bàdi bàjuula bulongolodi ku cyòci aci.

¹² Bu mùdi Cilongelu Cyà Bible cyà Moody, mwaba mulenga, kàdi kacya kwikala mùvwà naaci Moody to. Nwamònu anyi? Ne bintu bivwà Moody ùtwa nyama ku mikòlò, bóbò mbumùkekù ntàntà wa mùliyò wà kilòmèètà, kàdi’s ki bwalu mbwàbù’s. Nènku mpindyewu byònsò abi mbyà mamanya à mu mitù, pàvwà Moody yèyè naaci mu Nyumà, nudi numòna’s. Ne pa nànkù nudi—nudi nujandula ne, mu bintu abi.

¹³ Mpindyewu, pângààkabangà dyàmbedi, ne kulwa kaaba aka mu Phoenix emu, kùkaadi bidimu, mu nkwaka wa beena Mpenta, mvwa ne mpùngà wa kubanga bulongolodi kampànda mèmè mwinè. Bânà bèètù bà Mvùla-Mishìishe kulwabò kùndi, bàmba ne: “Ki cyòci eci. Tùbangà. Mòna’s, netwikalè—netwikale banène menemene kutàmba bakwàbò bònso bàà kùdìbo.”

¹⁴ Mèmè kwamba ne: “Luse’s wè! Aci kî ncyòci to. Aci kî—aci kî ncitùdi ne cyà kwenza to, bânà bèètù. Nudi—nudi buumuke mu njila—ntàntà wa mùliyò wà kilòmèètà. Nzambi kàdyàkucibèneshaku nànsha.” Balàayi bwalu bulonda. Balàayi Bible. Kakwàdyàkwikala bulongolodi bukwbò bwàpàtukàmù, bupàtuka mu eci nànsha. Ncyà bushùwà. Eci necivwijiibwè bulongolodi ne kubwela mu . . . Cidi mu ngiikàdilù wa Laòdikiyà mpindyewu. Kàdi nenkwambilè, mwanèètù ne, kakwènaku malongolodi mabèneshiibwe kùdi Nzambi yikalà mwà kujuuka kàbidì nànsha. Kakwàkwikala cintu nànsha cimwè cyà ku cyòci eci to. Tudi ku Dilwa dyà Mukalenge. Nwamònu anyi? Nzambi neàpatule bàshààdile mu nkwaka munèna wa nsangilu wa maèkèleeziya ewu, udi munkaci mwà kwenzeka mpindyewu, bwà kwenza Mukàjì musèla, kàdi kakwàdyàkwikala cintu nànsha cimwè cyàdyenza bulongolodi to, mu nyumà, kàbidì to. Nwamònu anyi? Nkumanè kujika.

¹⁵ Pàndi mmòna bânà bèètù, bânà bèètù bàà mushinga mukolè, bashindàmèenepù mùshindù awu, dîbà adi ndi ncitùnkumwinamu ne mwànyì mwònsò. Ne misangu mikwbò bânà bèètù bàtu bàmba ne: “Èè, Mwanèètù Branham ùdi ùtùlwisha. Twètù tudi . . .” Aci ntùpàkànyì. Èkèlekèlè! Aci’s—aci’s ncintu cidi ntàntà mule menemene ne ànyì meeji, ncyà kwikala ndwisha muntu kanà yònsò ewu. Ndi—ndi bwènù nwènù. Ndi mwanèènù, nwamònu’s, ne ndi ngenza ne mwànyì mwònsò. Ki bwà cinyi ncitu mukashààleku wa mu bulongolodi kampànda nànsha bùmwe to, mbwà ngàmona mwà kwimana pankaci ngàmba ne: “Mwanèètù, kùteeci. Awu kî njila to.”

¹⁶ Bàdi bàmba ne: “Twètù tudi beena Assemblées.” Abi’s mbilenga. Ma-Assemblées de Dieu àkaatu dibèneshà dyà nkèmenu kùndi. “Tudi beena Foursquare.” Èè, mònaayi mùkaatùbo dibèneshà dinèna kùndi. “Tudi beena Dîna dyà Yesù.” Mònaayi mùkaatùbo dibèneshà dinèna kùndi. “Tudi bakampànda, bakansanga.” Cyònsò cidiku aci, bàdi bònso mabèneshà. Bòbò—bòbò mbantu bàà Nzambi. Nwamònu anyi? Ne bantu bàà Nzambi bàdi mu byònsò abi.

¹⁷ Ne patùdi tukabwela mu didìsangisha, dyà twamba ne: “Twètù tudi ànu batàmbe bwìmpè kaaba aka kutàmba Église de Dieu,” nudi numòna’s, anyì ne: “Tudi bìmpe ndambù kutàmba beena Foursquare anyì beena Dîna dyà Yesù,” anyì cintu kampànda cyà mùshindù awu. Patùdi ànu . . . Tudi bafwànyine kupanganangana ndambù mu mmwènenu. Bu twètù bònso baye ku didyà dyà mundaamuunyà leelù ewu, tuvwa bònso

mwà kudya dyâmpà dishiilàngàne, kàdi's tudi bônso munkaci mwà kudyà ànu dyâmpà, nudi numòna's. Ki mmwènenu nyèye awu. Pa nàнку mmwènenu wa cyôci aci, ùdi ne, piikalàbi—piikalàbi ne tudi mwà kumòna ànu bwobùmwe bwètù. Dìbà adi kanùyì kashindameena pa bulongolodi to. Shìndameenàayi pa Kàlvaryò; Nudi nushààla bafwè ku bintu bikwàbò byònsò ebi. Nwamònu anyi? Ne ndi ngiitabuuja menemene. . .

¹⁸ Lekèlaayi ngambe eci nùнку pacidici mu meeji àànyi apa. Ndi ngiitabuuja ne bulongolodi mbwenze mudimu mwîmpe. Bwalu, kùdi misangu yàbùngi, bânà bèètù, nànsha mutùdi tukina bwà kwela meeji pa cintu eci, kùdi bintu bìdi bijuukile munkaci mwètù emu, ne bintu byà mùshindù awu, bìvwà biikale malongesha mabi. Ne bantu nebàngatè malongesha mabi awu kàdi kutangalaja naawù bantu mu mùshindù kanà wònsò. Ne musumbà wa bânà bèètù ùdikungwija bwà. . . ne ndi. . . Cìndi ngàmba's nkupàtuka bu mwàkenzabò mu matùkù à bangabanga, ne bintàkanyà byà mishindù yònsò. Ne—ne tucidi naabi byònsò kàbìdi leelù ewu, nwamònu's, biikale ànu byènda byènda. Ne cisàmbà cidi mwà kudikungwija pàmwè. . .

¹⁹ Cimfwànyi cilelèlà cyà Mpenta, ku wanyì mmwènenu, patùdi twakula bwa bulongolodi, ng'è—ng'èkèleeziyà, wa Mwanèètù Pethrus, èkèleeziyà wa Filàdèlèfiyà mu Suède. Mpindyewu, bòbò kabèèna bacyùka ne udi ne dilongesha dyà mùshindù kaayi to, pàdici ànu ne ncyà mu Mifundu. Nwènù baswè kucimòna mu mùshindù *ewu*, mu mùshindù *awu*, anyi cintu kanà cyònsò eci, kàdi panùdi ànu ne bwobùmwe biikale nwenda lwendu lukezùke lwà cijila lwà mwoyi. Ki bwalu mbwòbù abu's. Abi's mbîmpe. Nènku wèwè muswè kwamba ne Yesù ùdi ùlwa pa kabalù katòòke, ne mukwàbò kwambayè ne Ùdi ùlwa pa ditutu ditòòke, Mwindile mùshindù awu. Tùngunuka ànu kuya, paùdi ànu wenda lwendu lwîmpè lukezùke ne mwikàle ne bwobùmwe. Ke njila nyàwù. Ki cyôci aci.

²⁰ Aci, èè, mpindyewu, aci nkabingila kàmwè, balundà bàanyi, kàdi kènza ne ngiikala ne kasumbù kàà Beena Kantu-ku-byanza aba. Bwalu, ndi mumanyè ne kùdi bintu búngi cyanààna muntwamu bìdi bikèngela kwolodiibwa. Kàdi kì ci—kì cidi citàmbe bwîmpe citùdi naaci. Eyowà. Mmwòmò. Eyowà. Kùdi bintu byàbùngi bingiikalà ne cyà kwamba. Ne—ne nwènù, bânà bèètù bàdi mwab'ewu nebànwambile, ncitukù ndya cibàngà kumpàla kwàbò to. Ndi mwab'ewu bu musadidi wa Nzambì, bwà kwamba Bulelèlà. Ne nengiikalè ne cyà kulumbulula bwà bwalu abu. Ncyà bushùwà. Mwanèètù wa balùme Rose wàkamba ne: “Kì bwà cinyi tudi bakuswè.” Èè, aci—aci, èè, katwèna mwà. . . Bikèngela twètù—twètù kushààla ne Dìyi edi. Nwamònu anyi?

²¹ Kwenjiku ànu matùkù, ngèèla meeji ne, nuwva munwemu. . . Mvwa dyàmwàmwa dyà mbù, anyi muya mu cisanga cidimu cishààle eci, nènku bàwva ne disangisha kampànda, ne bàmwè bàà ku bânà bèètù bàwva buuja makaaya mu disangisha

dinène edi mùvwabo bapete beena kantu ku byanza, bàà mu ditunga dijimà. Ne bàvwa bààkula bàmba ne: “Mémè mvwa ne kaaba kakesè lwà mu ditumba. Byànyì bîmvwà ngenza kabîvwa bîmpè to. Kàdi mvwa mpicila mu cikondo cyà bwalu bukolè. Nènku katancì aka, mémè—mémè kubwela bwà kwakidila Kilistò, nènku—nènku, kaa, ndi ne bintu byònsò mpindyewu.” Mpindyewu, abi’s mbîmpè. Tudi twanyisha cyôci aci. Abi’s mbîmpè, kàdi ditanta kaditu misangu yònsò diswa kwamba ne n’Kilistò to. Aci, nwamònu’s, nènku bikèngela twètù kutàbaleela cyôci aci. Mpindyewu, aci’s ncîmpè. Nwamònu anyi? Mémè. . . Ncyèna naaci cilumbu to.

22 Kàdi mémè kubùndùlàngàneku ne bàna bèètù dilòlò adi. Twètù kupweka too ne ku cilaala-beenyi kutùvwà basòmbèla ka—kasùmbù kajimà, ne Mwanèètù Shakarian ne twètù bònsò. Ki mémè kwamba ne: “Èè,” mémè ne, “bàna bèètù, ndi muswe kunwambilakù.” Mémè kwamba ne: “Ndi—ndi ngèèla meeji ne nwènù bàna bèètù nudi kasùmbù kalengèle menemene kàà bantu kàndi mutuutàkeene naakù, kacya bàndela. Kàdi,” mémè ne: “bwalu bùdiku mbwà ne:” mungàakamba. . .

23 Ncyèna wa mu bulongolodi nànsha bùmwe to, kàdi ndi wa mu bwobùmwe ne bòbò abu. Ndi ne karta kàà bwobùmwe naabù, ki karta kàmwèpelè kàndi naakù, bwalu kàdi kàleerja malongolodi ónsò, nudi numòna’s. Ne cyôci aci ki cîndi muswè. Ke cîndi ndwàngèena mvità.

24 “Kàdi,” mémè ne: “cintu cidi cintacisha, ncyà ne nwènù bàna bèètù kumpàla kwà bantu bàdi kuntwaku, bàdi misangu cinunu batàmbe kutanta kunùtamba nwènù, kàdi biikalè nuteeta kubàmbila mùdi Kilistò mwikalè ditanta. Kanùteecikù bwà kubàsùmbisha aci to.” Nwamònu anyi?

25 Kanùteecikù bwà kufwànyikijiibwa ne bàà pa buloba to. Bàà pa buloba bàlwile mu byètù bipaapu. Kanùdyedi mu bipaapu byàbò to. Nwamònu anyi? Nwamònu anyi? Nwènù badyele mu bipaapu byàbò, katwàdyàkubàlakana naabò nànsha. Ndekeelu wa byònsò, Èvànjeeliyò kàtu ùbàlakana to; ùdi wèla nsèsà. Hollywood ùdi ùbàlakana. Èvànjeeliyò ùdi wèla nsèsà. Kùdi dishiilangana dinène pankaci pàà kwela nsèsà ne kubàlakana.

26 Ne pa nànkù, mpindyewu, ki mémè kwamba ne: “Bàna bèètù bàà kale bàà cyena Mpenta bàvwà ne kantu ku byanza, bàkateeta bwà kukàlekelela, bwà kudiisha bapèlè, ne bikwàbò byà mùshindù awu, ne kupàtuka kabàyi cintu nànsha cimwe to, nwamònu’s, bwà kuyiisha Èvànjeeliyò, bwà kuswikakana.” Mémè ne: “Mpindyewu tudi tuteeta kuditàmbisha bwà bitùdi naabi.” Mémè ne: “Ndishiilangana kaayi didiku’s wè!”

27 Kàdi mwanèètù mutekète wa mushinga mukolè, paanyimà pàà katancì kakesè yèyè kujuukila kuulu, kungambilyè, wamba ne: “Mwanèètù Branham, aci’s ke civwà cimwe cyà ku bilema bitàmbe bunène bikaadi bantu bènze kacya.”

28 Ki mèmè kwamba ne: “Mpindyewu, tàngilà, mwanèètù, ncìvwa nteeta bwà kwenzeja bantu bwà kupànyishabò civwàbo naaci to. Kàdi ndi ànu nteeta bwà kuleeja beena kantu ku byanza aba kaabwalu.”

Yèyè ne: “Aci civwa cilema citàmbe bunène, cyà bantu aba.”

29 Mèmè kwamba ne: “Bààkenza aci ku Nyumà Mwímpè. Nyumà Mwímpè ngwàkabàmbila bwà kwenza cyòci aci.” Pàdi Nyumà Mwímpè wàmbila muntu bwà kwenza ní ncinyi ní ncinyi, udi wenza cidìYe ùkwambila bwà wèwè kwenza.

30 Ki yèyè ne: “Èè, civwa ncilema citàmbe bubì menemene cikaadiku èkèleeziyà mwenze.”

31 Mèmè ne: “Bwà cinyi, mwanèètù?” Nènku ànu mwaba awu mene kumpàlà kwà muntu ùmvwà ngàakula nendè awu.

32 Yèyè kwamba ne: “Bwalu, pàakajuuka ànu kaacimvundù kakesè mu èkèleeziyà amu, kùvwa dishiilangana pankaci pàa beena Ngelikà ne—ne beena Ebèlù, ne bikwàbò,” kwambaye ne: “bantu abo kabàvwa ne mwaba wà kuya to. Kabàvwa nànsha ne kwàbò kwine kwà kwalukila to.”

Mèmè ne: “Ànu diswa dyà Nzambi menemene.”

Yèyè ne: “Mmunyi mùdi aci mwà kwikala diswa dyà Nzambi?”

33 Mèmè ne: “Bààkaya myaba yònsò, bènda bàtangelaja Èvànjeeliyò, bwalu kabàvwa ne mwaba wa kuya to.”

34 Nyumà Mwímpè kàtu wènza cilèmà nànsha cìmwè to. Kèna ànu ùcyèza to. Kwàjiki. Nènku ànu mùmvwà munkaci mwà kwakula dilòlò dishààle amu, bidì bikèngela ànu wèwè kushààla muupùkile Nzambi, ne kushààla muupùkile Diyì Dyèndè, ne kushààla ànu kacya waDyùpukila. Nànsha Dyòdi dikulombola penyì, tùngunuka wèwè ànu ne kuDìlonda. Lekèla byèndè biya ànu nànkù.

35 Kàdi ndi bushùwà menemene mu—mutù wa Bwobùmwe bwà Beena Kantu-ku-byanza ebu mpàndà. Ne ku mpungilu yònsò kùndi mubiikidiibwe, ntu ngàyakù pa ciibidilu ne ngàakulakù, ngàmbe byònsò bìndì mwà kwamba abi. Ncìyi nteeta kulamakaja cintu kampànda cyà kwamba, cidì cifwànyine kusànkisha muntu to, *Kampànda anyi kansanga*. Kàdi musangu wònsò wùndì nya ku disangisha dyànyì, ndi nteeta bwà kulonga ne kusambila ne kujila byàkudyà, ne ngàmbe ne: “Mukalenge Yesù, ncinyi—ncinyi cìndì mwà kwamba cidì mwà kwambulwisha bantu abu.”

36 Bantu bònsò mbamanyè ne mèmè ncitù muyiishi to. Mèmè ncitù mwakudi to. Ndi—ndi...Muntu yònsò mmumanyè aci. Mèmè ncyèna muyiishi to. Diyishi dyànyì—dyànyì nkusambidila babèèdi, ne bikwàbò byà mùshindù awu. Kàdi, mèmè ncyèna muyiishi to. Muntu kanà yònsò ewu mmufwànyine kumanya cyòci aci, pàdiye untèlèja nyiisha.

Kàdi cîndi ngàmba bushùwà, ndi muswè kucyàmba ne mwoyi mujimà bwà cyàmonaku mwa kwenza cintu kampànda.

³⁷ Kî mbwà kwamba ne: “Yèyè kî—kî mmwakudi wa dikànda anyi? Kèna ùkwàta mudimu ne mwakulu wèndè bîmpè anyi? Kèna ùkèmesha mu cyambilu anyi?” Neyèna muswè aci to. Neyèna—neyèna mufwànyîne kucyènza to. Nzambi kacya kàtu mumbiikile bwà aci to.

³⁸ Kàdi ndi nteeta bwà kupeta cintu kampànda ciikalà mwà kwambulwisha muntu awu, ne èkèleeziyà awu bwà kwikalayè èkèleeziyà mutàmba bwîmpè, kubàmbulwisha bwà kwikalabò bantu batàmba bwîmpè, kucisambidila.

³⁹ Mpindyewu, mvwa ngàakula mùshindù ewu bwalu mvwa mumòne bantu ndambù baciikàle ànu bàkungwilamù, mvùla pendè munkaci mwà kulòka. Ki bwà cinyi mvwa ngàmba bintu ebi. Mpindyewu, tusùnsà dikumi ne tùtaanu pashiishe.

⁴⁰ Nèku mpindyewu ndi muswè kusàkidila mwanèètù wa balùme. Ndi mumanyè Mwanèètù Fuller kùkaadi matùkù àbùngì, ntu ànu mumunange, mu ndòndò wa mwoyi wànyì. Ne tudi nendè ne bintu byàbùngì pàmwè, Mwanèètù Fuller ewu. Ki nànkù twètù. . . Ndi mumòne Mwanèètù Fuller mpindyewu kùkaadi bidimu byàbùngì, ne mvwa mumumanyè bu mulùme wa Nzambi mùshùwashùwàlè, ne ndi mumunangè. Nèku ndi kaaba aka mu dindà emu bwà kubwela mu bwobùmwe. Ndi mutàmbe kubungama bwà mùmvwà mupangile dilòlò dyèndè adi pàvwàbo badimanyishe mwaba ewu, kàdi ncìvwaku mwà kwenza mùshindu mukwàbò to. Ndi ne disànkà bwà kwikala apa mu dindà emu, bwà kumòna èkèleeziyà wèndè, mulenga, mùshindù ùdi Nzambi mubàtancishe ne mubàbènèshe. Ne—ne byònsò bidìYe mumwenzèla, ncyà bushùwà ne ndi mbyànyisha. Nzambi àtungunukèku ne kumubènèsha, ne kubènèshè tabernacle ewu, ne—ne—kasumbù kàà balubuludi, balami, ne bidimba byònsò byà èkèleeziyà. Nèku kolàayi ne tantàayi mu ngàsà wa Mukalenge, ke dilòmbà dyànyì dipwekèle.

⁴¹ Mpindyewu, kumpàla kwà kuseemena pabwîpi ne Dìyi, twanjàayi kuseemena pabwîpi ne Mwenadi, dyàmbedi. Twinyikàayi mitù yètù ànu katancì kakesè cyanààna bwà disambila.

⁴² Patùdi basòmbe kakùyì tuseku to mpindyewu mu Bwikadi bwà Nzambi, ne mitù yètù ne myoyi yètù miinyika apa, kùdikù mulòmbu mu mwoyi webè, cintu kampànda cyùdi naaci dijinga, cyùdi muswè bwà Mukalenge àkupèèsha, bwà ngaamònakù mwà kukuvùluka mu disambila dyànyì mu dindà emu mu èkèleeziyà emu anyi? Udiku mwà kudimanyisha ànu ku dyela dyà cyanza kuulu anyi? Shààla ànu mudilamè mu meei èbè, cyònsò cididi aci. Nzambi ènzèlekè yònsò wa kunùdi dilòmbà dyènu.

⁴³ Taatù Nzambi wa ngàsà ne wa cijila, Wàkafùka bintu byònsò ku Kìlistò Yesù, bwà butùmbi Bwèndè, tudi tubwela mu

Bwikadi Bwèbè mu dindà emu ne disàkidila pa mwoyi wètù. Ne mutùdi bendèshè màshinyi munkaci mwà mvùla, ne cipeepèlè cicolè munkaci mwà kutuuta, mvùla munkaci mwà kulòka, tudi tulòmba, Taatù wa mu Dyulu, bwà Wèwè kutùpòngolwelakù mvùla wa mu Dyulu, mvùla wa nyumà, mvùla mishishe ne mvùla yà mbedi, yònsò pàmwe, mu mwoyi yètù leelù ewu.

44 Tudi tulòmba, Taatù, bwà Wèwè kubènesha èkèleeziyà ewu. Tudi ne kusàkidila kwàbùngi bwà bwalu bwèndè, bwà mpaasàtà wèndè, bwà disangisha dyèndè, bwà . . . mwaba ùdi bantu mwà kutuutakeena biikàle ne musàkà kumutù kwàbò ne nkwasà milengele ne minefùke yà kusòmbamù.

45 Tudi twalukila mu meeji ètù ku bwalu bulonda bwà Èkèleeziyà wa ku cibangidilu, wa ku cibangidilu ewu, wa bàpostòlò, Èkèleeziyà wa kàtòlikè, ne kumòna mùvwàbò bàsòmba pa pipeyipeyi byà mabwe ne pa mbwebwe anyi pa cintu kanà cyònsò civwàbò mwà kufùdisha, bwà kutèeleja Dìyi dyà Nzambì, ne pashishe bàtwà binù panshi, byà bwalu abi kwikale mashika, pa lubwebwe piine apu manyaanu, pòpò apu bashààle beele byanza byàbò muulu ku Dyulu ne basànka bwà Bwikadi bwà Nyumà Mwímpe. Mubàpèèsha dipàngadika mu nsòmbelu wàbò mu mùshindù wà ne bàvwa mwà kabwela too ne bwinà bwà ntambwe, kabàyi mwà kunyunga nànsha kakesè, biikale ne mimwemwe pa mpàlà pààbò, batàngije mpàlà yàbò mu Dyulu, bamanyè bímpe ne, mu tusunsa tukesè, bàvwa ne cyà kwikala mu Bwikadi bwà Ewu uvwàbò banange.

46 Kaa, diitabuuja dyà baataatù bèètù, ditùungùnùke ne mwoyi, nànhsa mu bùlokò bwà mwinshi mwà buloba, mu ndimì yà kapyà ne mwelè wà mvità. Fùkùlulààkù munda mwètù, Éyi Mukalenge, diitabuuja dyà bwena adi. Tùpèèshèku dibènesha dinène dyà bàpostòlò dyà Nyumà Mwímpe.

47 Yònsò leelù ewu uvwa mwele byanza byèndè muulu, Wèwè udi mumanyè dijinga didiye naadi, Mukalenge. Wèwè udi mumanyè civwà paanyimà pàà cyanza aci, civwà cimusàka ne kiipàcìlà kàdi mu mwoyi awu. Wèwè nkààyèbè ki udi mwà kukùmbaja dijinga dyònsò, Mukalenge. Kàdi nyèwù mbasambidila, ncìyi mumanyè dijinga dyàbò to, kàdi mwikàle ndàmbula disambila dyànyì bu dibààkwila. Bu musadidi Webè, ndi ndòmba ne meeji matòòke ònsò bwà umwe ne umwe wàbò, bwà ne, cyònsò cidìbò balòmbè aci, swàkù bwà bàcìpetè. Bàbènéshèku, Taatù.

48 Nènku mpindyewu patùdi tubala Dìyi Dyèbè apa, ne tulongesha kàlaasà kàà Dyàlumingu aka, mutùdi mwà kwamba, mu dindà emu, ndi nsambila bwà Wèwè kwangata Méyi aa ne kulamuna bupidyà bwònsò ku Wòwò, Mukalenge; bwà se, bukolè bwònsò bwà Sàtaanà bwàswà bwà kuteeta kujuuka, bwà kuDipangisha bwà kukola abu, swàkù Dibwelèku mu mwoyi wònsò, ne mwómò amu mulwe micì yà bimuma byà bwakàne,

Mukalenge. Diitabuuja, ditwàla cyùdi Wèwè mulongòlòle bwà Dìyi Dyèbè kwenzadi, wàmba ne: “Kadyadyakwalukila Kùndi munda mutupù to, kàdi Nedikumbaje cìvwàbo baDitùmine.”

⁴⁹ Mpindyewu, Mukalenge, jidilà musadidi Webè. Dìyi Dyèbè dikaadi dimana kujidila. Nènku, bònsò pàmwè, swàkù bwà twikalè bakùmbàne mwà kudiisha mìkòòkò yidi Nyumà Mwimpè mutupèèshe bwà—bundeeji. Tudi tulòmba mu Dìna dyà Yesù. Amen.

⁵⁰ Mpindyewu, kunùdi nwènù bàsòmbèla baswè kubala mîngà misangu, kushààla pàmwè ne—Mukenji, mvwa... Ndi nnùlòmba, bu nwènù mwà kubuulula mu Mukànda. Nènku ndi ànu ne diyiisha dikesè bu dyà kàlaasà kàà Dyalumingu, nànkù awu, bwà bantu mu dindà emu.

⁵¹ Nudi mwà kungumvwa bìmpè, mu nyùngùlwilu mwònsò emu, mu myaba yònsò emu anyi? Ndi museemèje cikòlòkolo eci pabwipi. Ndi ne dīyi dimpàte ndambù. Mémè, ndi mwenze ànu mpweka kunweku, ke cimpumpu kunkwàtaci. Dyabùlù mmuteete ne mwèndè mwònsò bwà kumpangishayè bwà mémè kulwa munwemu. Ncyèna mumanyè to. Ndi ngiitabuuja ne Nzambì neàpongolole bushùwà cintu kampànda cinène pa mpungilu ewu bwà musangu ewu, bwalu Sàtaanà mmwenze ne mwèndè mwònsò bwà kumpangisha bwà kufikaku.

⁵² Kàdi mpindyewu netùbalè mu Genèsè, nshapità wa 22. Ne nwènù bàdi baswè kubuulula mu Bible wenù, twànjàayi kubala citùpà Cyèndè, bònsò pàmwè. Genèsè 22, túbangilàayi ku mvensà wa 9.

E kufikabò mu mwaba ùvwà Nzambì mumvwambile awu; ke Abraham kwasayè cyoshelu mwaba awu, ne kulongaye nkunyi mu bulongame, e kuswikayè Isààkà mwanèndè wa balume, e kumulongayè pa cyoshelu pamutù pàà nkunyi ayi.

Ki Abraham kwololayè cyanza cyèndè, ne kwangata kèlè bwà kushipa mwanèndè wa balume.

Ki mwanjèlo wa MUKALENGÈ kumubùkidilayè mu dyulu, wàmba ne: Abraham, Abraham: kwambayè ne: Ki mémè ewu.

Ki kwambayè ne: Kùtèèki cyanza cyèbè pa nsongàalume, anyi kùmwenzèdi cintu kampànda to: bwalu mpindyewu ngàmanyi ne udi ucìina Nzambì, pa kumòna ne kwèna mumpalè mwanèèbè wa balume, mwanèèbè umwèpelè mulela.

Ki Abraham kubàndishayè mèsù èndè muulu, e kutàngilayè, nènku kumònayè paanyimà pèndè apu cimpàngà cyà mùkòòkò cikwàcùbwe mu cikùtùkùtù cyà micì ku nsèngù yàci, anyi lwà ku nsèngù yàci, twambe nànkù: ki Abraham kuya kangata cimpàngà cyà

mùkòòkò aci, ne kumulàmbùlaci pa . . . bu mulàmbù wà kwosha pamutù pàa mwanèndè wa balùme.

Ne Abraham wàkabiùkila dinà dyà mwaba awu ne Yèhowàh-yilè: mmùdiwu ùbùkidiibwa too ne leelù ewu ne: Mu mukùnà wà MUKALENGE nebimwekè.

Ke mwanjèlò wa MUKALENGE kubùikidila Abraham mu dyulu bwà musangu mwibìdi,

Ke yéyè kwamba ne: Ngādicipi mu mèmè mwinè, mmùdi MUKALENGE wamba, . . . bwalu bwà wénjì eci cintu, ne kwèna mumpale mwanèèbè wa balùme, wèbè umwèpelè mulela:

Bwà ne mu kubènesha mèmè nènkebèneshe ne mu kuvudija nèmùdijè mamiinu èbè bu mìtootò yà . . . dyulu, ne bu lusenga . . . lwà ku mwelelu wà mbù; ne dimiinu dyèbè nedikòokeshè ciibi cyà mwena lukunà wadì;

53 Ndi muswè bwà kwangata cyambilu cyà ndekeelu aci bu cyena bwalu ne: *Ne Dimiinu Dyèbè Nedikòokeshè Ciibi Cyà Mwena Lukunà Wadì.* Aci's—mmulayi wà dikèma.

54 Mpindyewu, twètù tudi bamanyè bwalu bulonda ebu, pàngāpa babùbale, babùbalùlule, misangu ne misangu, bwà Abraham, ne mùshindù wàkamubiùkilà Nzambì kumupātùla mu ditungà dyèndè, ne mùvwāye muntu ànu bu bantu bōnsò emu, kakùyi cintu cyà pabwāci to. Kādi Nzambì wàkamubiùkila ne kumwenzela mulayi.

55 Mpindyewu, ndi njinga bwà nùmonè ne mulayi ewu ùvwà Nzambì mwenzèle Abraham kawùvwa ànu bwà Abraham nkāyèndè to, kàdi ùvwa nkùdi dimiinu dyèndè paanyimà pèndè. Mpindyewu, bantu bààbùngì bàdi bamba ne: “Kaa, bu ngikalapù nànsha bu Abraham, bu ngikalakù mwaba ùvwà Nzambì mufwānyine kwakula naanyi ne—ne mumpèeshe ditwishiiibwa bu mwàkadipèeshayè Abraham amu, dībà adi mvwa mufwānyine kwikala ne, mvwa—mvwa mufwānyine kwikala bulelèlè ne diitabuuja, Mwanèètù Branham, bu ngikalapu ànu, bu Nzambì mwakule naanyi bu mwàkakulàYe ne Abraham amu.” Kādi wèwè udi ne mulayi wùm wèwùm wè wùvwà naawù Abraham awu, mbwena kwamba ne, wèwè mwikàle Dimiinu dyà Abraham.

56 Pashìshe wèwè udi wamba ne: “Kādi, Mwanèètù Branham, mèmè ndi wa bàà Bisàmbà byà bendè. Nciwva mufwānyine kwikala ne dimiinu dyà Abraham to.”

57 Dimiinu dyà Abraham kadivwa dimiinu dyà mu mubidi to. Divwa n'Dimiinu dyà nyumà, bwà ditengudiibwa dyàbò kadivwa cintu nànsha cimwè to. Mulayi, Yéyè mene wàkamupèeshawù kumpàlà kwà ditengudiibwa. Kādi wàkafidiibwa kùdiye kumpàlà kwà ditengudiibwa, ne kabivwa ne mbwalu yéyè ùvwa

mutengùdìibwe ne mu cipungìdi ne Nzambì mùshindù awu to. Mbwalu Abraham wàkiitabuuja Nzambì.

⁵⁸ Nènku Mufundu mmwambe, ne: “Patùdi bafwè mu Kilstò, tudi tulwa Dimiinu dyà Abraham.” Pòlò ùdi ùcyàmba ne: “Nènku cidi mwena Yudà ki mmwena Yudà wa mmwenekelu wa pambèlù to, kàdi mwena Yudà munda.” Ki bwà cinyì, wèwè mulediibwe kùdi Nyumà wa Nzambì: “nudi Dimiinu dyà Abraham, ne nudi bapyànyì pàmwè ne Abraham bilondèshile mulayi.” Nwamònu anyi? Ki bwà cinyì mulayi wònsò wùdi Nzambì mupèèshe Abraham ngwènù, bwalu mu nyumà nwènù nudi Dimiinu dyà Abraham.

⁵⁹ Ne wèwè udi mutàmbe kwikala mwena Yudà kupita mùvwà mwà kwikala bu wèwè mulediibwè mu mashi à beena Yudà, ne pashiishe—ne pashiishe kwikala mwena Yudà wa ngiitàbijilù wa cyena kale mu èkèleeziyà awu, ne mwikale muvidi wa Nyumà Mwimpè wa mushinga mukolè ewu ne Mukalenge Yesù Kilstò. Nwamònu anyi? Udi mutàmbe kwikala mwena Yudà, bwalu udi mwena Yudà udi mulediibwe ku mulayi wà mu Dyulu, wàkapèèshàbo Abraham kùdi Nzambì awu, ne Abraham kuwìtabuuja ku diitabuja, ne aci ki cyàkamwenza cìvwàye aci. Mwena Yudà, yèyè mwine, s’ùdi ànu ditàpuluka cyanààna, ne mwena Ebèlù, musabùke, ne bikwàbò byà mùshindù awu.

⁶⁰ Mpindyewu, kàdi dîbà dyùdi wèwè mutàpùlùke ne bintu byà pa buloba, musabùke mulongo wà ditàpuluka, ne musòmbèle mu buloba bwenyi, buloba bwà bwena bùvwà kùyimù, ku cibangidilu abu to, ne bantu baùvwà kùyì kacya mudisangishe naabù pàmwè ku cibangidilu to, dîbà adi udi ushààla mwena Yudà wa Nyumà. Bwalu, mùshindù ùmwèùmwe ùvwà Abraham, ku diitabuuja, muumukè mu ditungà dyèndè, mushiye cisàmbà cyèndè, muyè mu buloba bwenyi ne bantu benyi awu, nudi bashiye cisàmbà cyènù, bashiye byà pa buloba paanyimà pèènù, bashiye banùvwà badisange nààbo pàmwè paanyimà, basabùke, bapicile mu Mashi à Yesù Kilstò, biikale beena lupitàpità, nwenda nukeba Cimenga, cidi Mucibaki ne Mucyènji mwikàle Nzambì, ànu mùvwà Abraham amu. Beena Lwendu, pàmwè Nendè, basòmbèle mu ntentà, maèkèleeziyà’s, beena-mwàbò bàà Bukalenge bwà mu Dyulu, bapyànyì bàà bintu byònsò ku Yesù Kilstò. Nwamònu anyi? Tukàadi basabùke, batàpùlùke.

⁶¹ Mpindyewu, Abraham, mulayi mmwenzela Abraham ne Dimiinu dyèndè paanyimà pèndè. Mpindyewu, Nzambì ngudi mufile mulayi ewu kùdi Abraham, wa Dimiinu dyèndè, ne ùvwà mufwànyine kukòokèsha ciibi cyà mwena lukunà wendè paanyimà pàà Yèyè mumanè kuteeta Abraham, mwele Abraham ku diteeta. Mpindyewu, paanyimà pàà diteeta dimane kulwa, dîbà adi . . .

⁶² Abraham ùkaavwa mumanè kukùdimuna mucìma, mutùdi mwà kucibiikila, muumùke ku bumpàngaanù mubwele mu

Nzambì. Ne pashiishe Nzambì wàkamupèèsha, ditengudiibwa, bu cimanyinu cyà Nyumà Mwímpè. Pashiishe, paanyimà pàà ditengudiibwa, pashiishe kulwakù cikondo cyà dyediibwa ku diteeta.

⁶³ Cifwànyikijilu cilenga be kaaba aka cyà Èkèleeziyà, cyà ne, paanyimà pàà twètù bamanè kusungidiibwa, dîbà adi tudì tupèèshiibwa citampì cyà ditengudiibwa dilaya, didì kadiyì dyà mubidi to, kàdi dyà Nyumà. Ne Nyumà Mwímpè ke ditengudiibwa dyètù. Nkelè katwè kàà Nzambì. Ùdi ùkòsa ne uumusha cidi kaciyì ne mushinga ku mubidi, cyà maalu à pa buloba, ùcùmusha ma twètù. Díyì dyà Nzambì, nditwè kupita mwelè wa mvità wa nseke yibidi! Pa nàнку, nudi numòna's, dyàlukila cyàkàbìdi, Díyì dyà Nzambì ki cintu cidi Nyumà Mwímpè ùkwàta naaci mudimu; kî ntwitabaayi to, kî màngumba to. Kàdi Díyì ki didì ditùtapulula ne bintu byà pa buloba. Didì dyumusha mmwènenù yètù, ne ditùlambula mu kabujimà kùdi Nzambì.

⁶⁴ Yesù wàkamba ne: “Nwènù bashààle munda Mwànyì, ne Díyì Dyànyì munda mwènù.” Ki bwalu mbwòbu abu's. Dîbà adi, kî n'díyì dyèbè to. N'Díyì Dyèndè. Dîbà adi, nudi numòna ne: “Nwènù bashààle munda Mwànyì, ne Díyì Dyànyì munda mwènù, nudi bafwànyine kulòmba cinùdi baswè aci.” Uh-huh. Nwamònu anyì? Ncinyì aci, kwèna wakula díyì dyèbè sungasunga to. Udi wakula Díyì Dyèndè.

⁶⁵ Nàнку dîbà adi Nyumà Mwímpè n'Yèyè udi wangata Díyì dyà Nzambì ne ùtùtapulula ne bintu byà pa buloba ebi, nwamònu's, ditengudiibwa, dikòsa. Dîbà adi udi upicila mu cikondo cyà dyediibwa dyà ku diteeta.

⁶⁶ Mpindyewu, Abraham, paanyimà pàà yèyè mumanè kubìkidiibwa bwà kupàtuka, buloba bwà beena Kasàdà, cimenga cyà Ulà, wàkashààla mwena lwendu, mwena lupitàpità. Ne pashiishe Nzambì wàkamubiikila, paanyimà pàà yèyè mumanè kujaadikiibwa ne ùvwa ne cyà kutùngunuka ne kukwàcila Nzambì ku Díyì Dyèndè. Pashiishe, ncinyì cyàkenzà Nzambì dîbà adi, cìvwa nkumupèèsha cimanyinu, cyà ne Ùvwa mumwitabe, ne Wàkamutengula. Ne wàkatengula Ishàmèlà ne bònsò bàà mu nzùbu mwendè.

⁶⁷ Nènku mpindyewu nudi numòna's, paùdi—paùdi ubìkidiibwa bwà kupàtuka, dyàmbedi udi upicila ku diteeta, bwà kumòna ní watùngunuka bulelèlà. Ne pashiishe Nzambì ùdi ùkupèèsha Nyumà Mwímpè, cidi ciikàle cimanyinu cyà ne mmwitàbe diitabuuja dyèbè dyùdi ùjikula ne udi naadi mu Yèyè adi. Nudi nundonda mpindyewu anyì? Yèyè neadiitabe.

⁶⁸ Mpindyewu, mvwa nyiikilangana ne... Kùdi mwà kwikala bàna bèètù ba-Baptistes bàà mushinga mukolè basòmbe kaaba aka. Ne muntu yònsò mmumanyè ne ndi mufùmìne mu èkèleeziyà wa ba-Baptistes. Mvwa ngàakula ne mwanèètù

wa ba-Baptistes. Ki kungambilayè ne: “Mwanèètù Branham?” Ûvwa Docteur mu Bunzambì, muntu wa maalu malenga, mwena Kilistò mulelèlà. Kwambayè ne: “Kàdi, Mwanèètù Branham, mpenyi paùdi upeta dibàtiiza dyà Nyumà Mwímpè diikàle cintu cishiilàngàne ne diitabuuja mu Kilistò Yesù?”

Mémè ne: “Mbishiilàngàne, mwanèètù wa balùme wa mushinga mukolè.”

⁶⁹ Yèyè ne: “Kwènakù wela meeji ne paùdi upeta Kilistò, udi upeta ne Nyumà Mwímpè anyi?”

⁷⁰ Mémè ne: “Mmòmu. Kàdi,” Mémè kwamba ne: “udi umona’s, udi ànu ujìkula cyanààna ne udi mwakidile Kilistò, too ne pàdiYe ùciitaba.”

⁷¹ Kwambayè ne: “Mwanèètù Branham, Abraham’s wàkiitabuuja Nzambì, ne kubadiibwaci kùdiye bu bwakàne.”

⁷² Mémè ne: “Èyowà. Kàdi Nzambì wàkamupèèsha cimanyinu, cyà ne Ûvwa mwakidile diitabuuja dyèndè, pàakamupèèshàYe citampì cyà ditengudiibwa, ne Yèyè wàkaanyisha diitabuuja dyèndè.” Amen.

⁷³ Mpindyewu, patùdi twakidila Kilistò bu Musùngidi wetù, díbà adi, twètù ne meeji matòoke mu cyòci aci, díbà adi Nzambì ùdi ùtùpèèsha cimanyinu, cyà ne Yèyè mmwakidile diitabuuja dyètù mu Kilistò, ku ditùpèèsha citampì cyà ditengudiibwa, cidì Nyumà Mwímpè. Ki citampì cyà ditengudiibwa ncyòci aci. “Kanùbungamiji Nyumà Mwímpè wa Nzambì unùdi batwibwe nendè citampì too ne ku Ditùkù dyà Bupikudi bwènù.” Kì nne too ne ku disangisha didì dilondà to; kàdi ku Ditùkù dyà Bupikudi bwènù. Ncyà bushùwà, Efèsò 4.30. Mpindyewu, mùshindù awu ki utùdi tupeta Nyumà Mwímpè.

⁷⁴ Mpindyewu, wèwè mwambè ne: “Kaa, mémè ndi mwena kwitabuuja,” kàdi Nzambì kacya kàyì mukupèèshe Nyumà Mwímpè to, Yèyè kacya kàtukù mwanji kucyànyisha to. Wèwè udi ànu ujìkula ne udi witabuuja. Kàdi pàdi mpatà yònsò. . . Ncyèna ngàmba ne kwèna mwena kwitabuuja mpindyewu to. Mu cipidi kampànda, wèwè udi mwena kwitabuuja.

⁷⁵ Kàdi pàakapeta Nzambì luse, to, pawàkapeta wèwè luse kùdiYe, nènku Yèyè ùkwitaba bu mwan’Èndè, ne Yèyè mmumanyè mwoyi wèbè, ne Ùdi ùmòna meeji èbè matòoke, Yèyè mmumanyè ne bintu byònsò mbimana kukòshiibwa byumusha kùdi. Díbà adi Yèyè ùdi ùkutwà citampì mu Bukalenge bwà Nzambì, ku Nyumà Mwímpè, ùshindikila bàà pa buloba ne mmwitàbe diitabuuja dyùdi ujìkula ne udi naadi mu Yèyè adi. Nwacyùmvù mpindyewu anyi?

⁷⁶ Mpindyewu, dyàkàmwè paanyimà pàà cyòci aci, kùdi kùlwa diteeciibwa. “Mwànà yònsò udi ulwa kùdi Nzambì ùdi ne cyà kunyookiibwa dyàmbedi, kuteeciibwa.”

77 Yesù, mmwenze ànu Wàkidila cyuwidi cyà Nyumà, ku musulu, pàakaMubàtiiza Yone, dyàkàmwè dyabùlù kuya Nendè mu cipèela, bwà kupìcila mu cikondo cyà diteecibwa. Kàdi pàakangatàYe Díyi dyà Nzambi ne kucìmuna dyabùlù, “Bàakafùnda ne. Bàakafùnda ne,” Wàkapàtukamù díbà adi mudìlongolole bwà mudimu Wèndè wà bwambi.

78 Nènku mùshindù awu ki ùvwà Nzambi mwenze Abraham. Mpindyewu, Nzambi, paanyimà pàa yèyè mumanè kumubiikila mu buloba bwèndè, ne wàkaditàpulula ne buloba bwèndè, cisàmbà cyèndè, ne pashiishe Nzambi wàkamupèèsha cìtampì cyà ditengudiibwa, pashiishe kumupèèshayè mwànà wa balùme. Pashiishe e kupicilayè ku diteeta dyà ndekeelu adi, too ne mu cikondo cìvwàye ne cyà kulàmbula mwanèndè umwèpelè mulela Isaac awu bu mulàmbù. Ki kwamba Yè ne: “Pa kumòna ne kwèna mulaminyine mwanèèbè mulela umwèpelè, ngààmanyi ne udi muNange.” E kuMwelayè diteeta adi.

79 Pashiishe dyàkàmwè paanyimà pàa cyòci aci, mvità e kucìmunyibwayi díbà adi, Yèyè ne: “Ne Dimiinu dyèbè nedikookeshè ciibi cyà mwena lukunà wadi.” Amen. Mèmè ntu munangè aci. “Neàkòokeshè ciibi cyà mwena lukunà wèndè.” Netùfikè pa kaaba kàa ndekeelu aku ànu mu tusunsa tukesè cyanàànà emu, bu Mukalenge mwà kwanyisha. Mpindyewu Yèyè wàkasangana eci, Abraham mwena lulamatu. Paanyimà pàa Yèyè mumanè kusangana ne Abraham mmwena lulamatu, díbà adi Wàkamupèèsha mulayi wà kukwàta ciibi cyà mwena lukunà.

80 Mpindyewu mwaba awu, misangu yàbúngì, ki ùvwà bààbúngì bàà kutùdi twètù beena Mpenta benzèle cilema ngwòwò awu, kàdi twela meeji ne: “Èè, Nyumà Mwimpè mmumpòngolwela pambidi. Butumbi kùdi Nzambi’s wè! Ki cyònsò cìndi ne cyà kwikala naaci ncyòci aci.” To, mukalenge. Ucidi ànu utwàdijilaku díbà adi. Wèwè, kì ndìbà adi to. Nдитеeta dyèbè ne diteeciibwa dyèbè.

81 Mbyenza ànu bu mutùdi tusangana mu—mu, lwà mu di—di—Dipungila Dikùlùkulu; diteeta, diteeciibwa, ne pashiishe ditèekiibwa dyà mwànà wa balùme. Ditèekiibwa, dishikikiibwa dyà mwànà paanyimà pàa yèyè mumanè kwikala mwànà wa balùme, mulediibwe mu dikù adi. Mmwànà wa balùme, pashiishe mmufwànyine kwediibwa ku diteeta, kuteeciibwa, ne kukoleshiiibwa kùdi baandeeji, ne kumòna mùdiye ùcimuna. Ne pashiishe ùdi ùtèekiibwa pa kaaba kàa mwomùmwe, menemene, kàa tatwèndè.

82 Mpindyewu ki cyòci aci cìdiku leelù ewu. Tudi bapete bidimu bitwè ku makumi ànaayi byà diteeta dyà Mpenta, anyi bipite apu, nwamònu’s, kuteeta èkèleeziyà, bwà kumòna ne neimanè kuulu, anyi kàakwimana to. Pa kumòna cyùdi. . . Ne, kumòna, ki mwaba ùndi ncipetela kàbidì. Pamutù pàa kushààla bakwàte ku nkurusè ne ku Díyi, ne kutungunuka, tudi bashààle twenda

tulonda nkwaka wa bàà pa buloba, tuupukila *ewu* njila, anyi tuumuka mu *ewu* njila, anyi tutentula *ewu*.

⁸³ Bu mûntù ngàakula ntàndisha bikolè bantu bàà mu nkwaka wa cyena leelù *ewu*, bakàji bakòsa nsuki yàbò, ne—ne balùme bènza maalu à lukutukutu ne bikwàbò byònsò, ne bavwàle bilàmbà byà bìsalulangana masandi ne bikwàbò. Ndi mupete didyudiibwa dyàbùngi pa bwalu abu. Kàdi ncinyi aci? Nkuteeta bwà kusùngila èkèleeziyà awu. Nkuteeta bwà kubàfikisha kuulu *eku*, ku Dîyi dyà Nzambì, katùyi tutàngila cidi bakwàbò bàà pa buloba ne cyà kwamba pa bwalu Abu. Shaala ne Dîyi dyà Nzambì. Amen. Nwamònu anyi? Nwamònu anyi?

⁸⁴ Cintu cidiku ncyà ne, bu mûmvwà ngàmba makèèlèlè dilòòlò awu, beena Mpenta mbindila cipeepèlè cicolè cyà civuma, kàdi mbapanga bwà kutèeleja kaaDîyi kakesè kapolè aku. Nwamònu anyi? Abi, mbibì bwà kwenza bintu abi. Bàdi bèela meeji ne: “Pàcidi ànu cipeepèlè cicolè aci civuma, mbîmpè.”

⁸⁵ Kàdi aci kacyakakòka ntèmà yà mupròfeta to. Cipeepèlè cicolè kacyakatàcisha mupròfeta Eliyà mu nyòngòlò nànsha. Makùbakùbà makolè ne mikenyi, ne dipòngòloka, kabyakakòka ntèmà yèndè to, nànsha kakesè. Kàdi cyàkamulengà civwa ndiyyi dikesè dipolè, cintu kampànda aci cidi cyàkula nendè munda. “Dîyi Dyànyì didi Bulelèlè. Dîyi dyà muntu yònsò diikalè mashimi, ne Dyànyì diikalè dilelèlè.” Ki cyàkakòkà ntemà yà mupròfeta ncyòci aci. Nwamònu anyi?

⁸⁶ Neciikale citungunuka ànu ne dicyènza. Dîyi dyà Nzambì ditu misangu yònsò dikòka meeji à nyumà, bwalu mmeeji à Kilistò munda mwèbè, àdi mamanyè ne Dîyi adi ndilelèlè.

⁸⁷ Ne udi upicila mu cikondo cyà diteeta. Èkèleeziyà ùdi ùpicila mu cikondo cyà diteeta. Muntu nkààyà yònsò *ewu* ùdi ùpicila mu cikondo cyà diteeta kumpàlà kwà kufikayè ku dikwàta ciibi cyà mwena lukunà. Abraham wàkapìcilamù. Kilistò wàkapìcilamù. Paanyimà pàà Kilistò mumanè kuujiibwa tètè ne Nyumà Mwimpè, ku musùlù wa Yadènè kwàka, Yèyè wàkapìcila mu cikondo cyà diteeta. Paanyimà pàà Abraham mumanè kubùkidiibwa, mutèeka mu buloba bwèndè mùvwàye ne cyà kwikala mwena lwendu, ki pashishe kufila ditengudiibwa, ki Nzambì kutuutakeena nendè, ku musangu ne ku musangu, nànsha nànkù ùvwa ne cyà kupìcila mu cikondo cyà diteeta; Dimiinu dyònsò dyà Abraham didi dyènza cintu cimwècimwè aci, Abraham ne Dimiinu dyèndè.

⁸⁸ Bulongolodi kampànda, èkèleeziyà kampànda, ki cidi cyènza ne tudi tusangana malongolodi ètù munkaci mwà kukùluka kumpengà kwà njila, mbwà pàadiwu afika ku diteeta. Diteeta ncinyi? Dîyi dyà Nzambì. Ki diteeta ndyòdi adi. Dîyi dyà Nzambì ki diteeta. Netwenze cidi musumbà wa bantu wamba bwà kwenza, anyi netwenze cidi Nzambì wamba bwà kwenza? Ki dishiilangana ndyàdi.

⁸⁹ Ke mwàkadibi, mu matùkù à Dwight Moody, mu matùkù à Finney, Sankey, Knox, Calvin, Spurgeon, bakwàbò bònso abu, bantu bàà nyumà abo, malongolodi àkabàlonda paanyimà. Kwàkajuuka kasùmbù kampànda kàà bantu kuntu kwàka bàakabwejàkaja yàbò njila mu cyòci aci, muntu yònsò wítabuujà *eci* ne *cyàcya*, ùsàkidila kakesè *apa*, ne ùmushila kakesè *kwàka*, ne ùsàkidila kakesè *apa*, too ne mwàkacyenzàbo ndekeelu wa byònsò bulongolodi.

⁹⁰ Nènku pàdìbo bènza nàнку, mwena kwitabuujà mulelèlè menemene, Nzambì ùdi ùlwa ànu lwà ku nyùngulwilu aku ne ùbakula muntu kampànda mukesè, mupwekèlè, ùsùnsula cintu aci tupese tupese. Mmwòmò. Útu úcyenza misangu yònsò. Nzambì kàtu ùshintuluka to. Úsùnsulula cintu aci tupese tupese, bàmwè bantu bàà meeji àà nyumà biikalà mwà kushààla ne Dìyi adi.

⁹¹ Lekèlaayi nzwambìle. Ndi ne mukàndà mumfùndila kumbèlu, wà kùdi umwe wa ku maèkèleeziyà matàmbe bwìmpè, malongolodi manène à mu nkwaka wa cyena Mpenta. Mukàji mukwàte ne byà luse wa mwoyi mucibùlùke awu mmumfùndile mukàndà. Ki mukàji awu kwamba ne: “Mwanèètù Branham, mwva ne nsuki mile ne mwva muyenze kafulu lwà mu dikoshi mwànyi.” Yèyè ne: “Ne ba... Bàyàanyi ùvwa mukàswe.” Ki yèyè ne: “Twètù kuumuka mu cimenga mutùvwa ne èkèleeziyà uvwa bulelèlè wa nyumà, kubwela mu èkèleeziyà munène ewu, èkèleeziyà wa kumpàla wa mu cimenga.” Ki yèyè ne: “Patwàbwèdi muntwamu, bàna bèètù bàà bakàji bàà cyena Mpenta bàvwa bakòsa nsuki yàbò.” Kwambayè ne: “Kubangabò kungeela mutooyi bwà yànyi. Mémè kwamba ne: “To, to. Ndi ngiitabuujà ne Bible ùdi wamba ne twètù katwènji nàнку to; bìdi bundù bwà kwenza nàнку.” Ki kwambayè ànu ne: “Nènku kutungunukabo...” Bàvwa mwà kumuseka, bàmba ne: “É, webè—webè ndundu’s mmupàtuke mupùya, wa paanyimà awu’s, ne byònsò byà mùshindù awu. E kwelabò bàyaanyi mutoyi, mu mùshindù wà dikèma, too ne mwàkafikaye ku dingenzeja ku makàndà bwà mémè kukòsa nsuki yàanyi ayi.” Ki yèyè ne: “Kubangila ànu apu ndi ndyumvwa mupiishìbwe.”

⁹² Anji elàayibi meeji ku bwalu abu, èkèleeziyà wa beena Mpenta udi ne cyà kutwà ku cyà Dìyi dyà Nzambì awu’s! Ki kùyaaya bulongolodi bwènù kanùfikisha aku. Mmwòmò. Mbangile bwà kutèlejeja kaaDìyi kakesè kapolè kà Dìyi, kàdi kàbàbìkila ku bulelèlè aku. Bàdi bònso munkaci mwà kutèlejeja bipeepèlè bikole byà bìvuma, ne dyela dyà mbilà bùngi cyakà ne maja, bàmba mùdìbo ne bukolè. Abi byònsò mbìmpè. Ndi ngiitabuujà byòbi abi, mémè pàanyi. Kàdi, mwanèètù, pàudi mwà kuja maja ne kwela mbilà, ne pashìshe kukùdimuka kàdi kuvila Dìyi dyà Nzambì, ne kwikala ne nsòmbelu bu wa bàà pa buloba, kùdi cintu cipampàlamùke mwaba kampànda. Cyà bushùwà.

⁹³ Nyumà wa Nzambi ùdi ùpweka, Díyì dikesè dipòle adi, ne ùkulombola buludi too ne ku Kàlvaryò, kutùdi bafwè, ne mwoyi wètù mmusokoka mu Nzambi ku Kilistò, ne batwìbwe citampì kùdì Nyumà Mwímpè. Pashiishe, Díyì adi nkààyaadi didi ne mwoyi mwaba awu. “Dìbà adi nwènù bashààle munda Mwànyì, ne Díyì Dyànyì munda mwènù, nùlombè cinùdi baswè ne nebànùpèèshèci.” Ki dishiilangana ndyòdi adi.

⁹⁴ Ndi ntèkemenà ne ncyèna mmwènèka kunùdi bu mukoleshi wa maalu to. Byòbì nàнку, ndi—ndi—ndi mupangi wa bwalu abu. Ndi—ndi ngiitabuuja ne Díyì dyà Nzambi didi Bulelèlà, ne Didi ne cyà kushààla ànu kaaba aka mene. Kàdi dyòdi dishààle mwaba ewu, neDìdileeje patòoke. Didi ne cyà kudileeja! Nsòmbelu webè, byèbè byònsò, nebiikale bishiilàngàne.

⁹⁵ Nàнку pàvwà Nzambi mwele Abraham diteeta, wàkakwàta, lukàmà pa lukàmà. Ne ùvwà mufwànyine . . .

⁹⁶ Nzambi kèna mwà kwela bulongolodi diteeta to, bwalu byònsò mbisopakaja. Nzambi katu ùkwàta mudimu mu mùshindù awu ne bulongolodi to. Kèna ùkwàta mudimu ne matùnga mu Bisàmbà byà bendè to. “Wàkapàtula bantu mu bàà Bisàmbà byà bendè.” Bwà Izalèlèlà, Wàkangata ditùnga. Kàdi, bwà bàà Bisàmbà byà bendè: “Wàkapàtula bantu mu bàà Bisàmbà byà bendè bwà bwalu bwà Dìnà Dyèndè.” Pa nàнку, nudi numòna’s, kì mbulongolo- . . . Kì mbulongolodi to. Mmuntu-nkààyà udiYè ùpàtula mu bàà Bisàmbà byà bendè.

⁹⁷ Ne pàdi diteeta dilwa, nudi numòna cidi cyènzeka anyi? Tuvwa bapàtùke bwà dibingishiibwa. Tudi bapetè dibàtiiza dyà Nyumà Mwímpè mu nkwaka wa mpenta. Kàdi pàdi cikondo cyà diteeta cilwa, tupeta bamanyi bàà mabàla bapilulùke, bàdi baswè kufwànangana ne bàà pa buloba, ànu mwàkadìbi mu matùkù à nkwaka wa Wesley ne bakwàbò bónsò abu amu. Bàdi bàya mu cilongelu. Bàdi—bàdi bàlonga maalu à mamanya. Ne bàdi bayiila bintu byònsò byà mishindù mikwàbò bìdi byèndela pàmwè ne dilonga abi. Ne bàdi bàteeta kuyiila maalu à mu nsòmbelu. “Cidi ànu cintu citambe bwímpe, èè, kwàmbi *nùнку* to. Bàlekele bènzà *cikampànda* ne *cikansanga*. Bwalu neciikale. . .” Nwamònu’s nudi munkaci mwà kwenda kungwija ne kwibaka. Kèènù—kèènù—kèènù kiipàcilà nkabì. Kèènù kalumbilà nkabì. Udi munkaci mwà kwibakila bulongolodi pamutù pàà kwibakila Kàlvaryò. Mmunyì mùdì mwà kwibakila Kàlvaryò, paùdi kùyì ubwelela ku njila wa Díyì?

⁹⁸ “Bwalu twètù tudi basukula ku màyi à Díyì.” “Nwènù bashààle munda Mwànyì ne Mèyi Àànyì munda mwènù, dìbà adi nùlombe cinùdi baswè aci.”

⁹⁹ Ki mwaba utùdi tumwènèna dicìmunyiibwa dyà nkwaka wa cyena Mpenta ngwòwò awu, bwalu bàdi buumuka ku Díyì. Díyì nedyambe cintu kampànda; bòbò nebàteete bwà kubwejela bulongolodi mu mwaba kampànda. Ne nebuumuke dyàkàmwè

ku Dîyì adi, ne kudibwejamù buludi pàmwè ne bulongolodi. Nènku nudi numòna kwàyibi kafika anyi? Mbyènze ànu bu mùdì maèkèleeziyà makwàbò. Kàdi pashiishe tuja maja ne twela mbila mikolè, ne twakula mu myakulu, tutùpika tuya muulu ne panshi, bintu abi mbîmpè. Bulongolodi bwàbò mbwîmpè. Ndi ntèkemena ne ndi mutòòkèshe maalu. Kàdi bwalu bùdi ne, kaaDîyì kakesè kapolè kàà Dîyì kàdi kàpàtuka aku. Ki kwòkò.

¹⁰⁰ Udi upicila mu diteeta. Nzambi ùdi ùkuteeta bu mwà kateetàye Abraham amu. Ùdi ùteeta Dimiinu dyà Abraham, paanyimà pèndè. Nènku mpindyewu, cidi cyèza ne katwèna tukwàta ciibi cyà mwena lukuna, cidi cyèza ne kùdi byàbùngì munkaci mwètù, mbwalu katwèna bàkùmbàne mwà kukàndamana mu diteeta to. Nènku lekèlaayi nnwàmbilèku cintu kampànda, diteeta dyà Dîyì didi dyà bushùwà.

¹⁰¹ Cidi cyèza ne katwèna ne, kàbìdi ne katwàdyàkwikala ne...mu bulongolodi. Ngèèla meeji ne Mpenta mmupetè bulongolodi kampànda bwà bwîmpè. Bàmwè bàà ku bantu batàmbe bwîmpè bàndì. . . bàdi. . . bàdi basòmbe pa buloba apa, mbà mu wòwò—wòwò malongolodi amu.

¹⁰² Beena Assemblées de Dieu, ndimù ne balunda. Ekèlekèle! Mwanèètù wa balùme ànu lwà mu Indiana mwàmwa, mungikalà ne cyà, ne cyà kwenzela masangisha amu, ngèèla meeji, muntwamu, ànu àdi panshi aa. Mwanèètù Roy Weed, yèyè mmulombodi wa distriki wa mu ditunga dyà Indiana. Ndi ngèèla meeji ne mmuntu wa difwànà dyà Nzambi. Pàbì's mmulombodi wa distriki wa Assemblées de Dieu.

¹⁰³ Mu Foursquare, kaa, ekèlekèle, mbantu bùngì kaayi's wè! Ralph McPherson ne bàbùngì bàà ku bàna bèètù abu, bàdi bantu bàà difwànà dyà Nzambi, kakùyì cyà kubàbanda naaci mu nsòmbelu yàbò. Mbantu bîmpè.

¹⁰⁴ Too ne mu ba-Unitaires, mùdibo bàdibiikila nkààyabò ne, ba-Unitaires. Anyi, mpindyewu, ncyèna ngèèla meeji. . . Bàdi bàcibiikila ne ng'èkèleeziyà wa Dîna dyà Yesù. Jack Moore, bwà kutèèla ànu umwe cyanààna mu. . . Bàdikù nkàmà ne nkàmà, bantu bîmpè, bantu bîmpè, balùme bàà difwànà dyà Nzambi.

¹⁰⁵ Kàdi bwalu bùdiku mbwà ne, mwanèètù, mbwòbò ebu, ndìbà dyùdi uswikakana ne bulongolodi abu. Nwamònu anyi? Nzambi ùdi wàngata malongolodi awu, ne—ne wònsò mmakùlùke. Àtàngilaayi, maalu à pa buloba madifindèmu. Tàngilàayi bakàji bààbò. Tàngilàayi balùme bààbò. Tàngilàayi ngiikàdilù yàbò. Ndi mwà kunùfunkwina, bantu bàà mu Assemblées de Dieu bàdi ne balami mu kasùmbù kààbò, biikale basèle misangu yibidi anyi yisàtù, bayiishi bènza maalu à lukutukutu. bakàji ne nsukì yàbò mikòsa, bavwàle tùpùtulu, badìlaabe bilaabu, cikòlà batùngunuka ànu ne kwamba mùdibo ne Nyumà Mwîmpè, beeyèmèna pa cijaadiki cyà dyakula dyà mu myakulu, anyi ditùpika diya muulu ne panshi, anyi dyela dyà mbilà.

106 Mbapangile kaaDìyì kakesè kapòle kàà Dìyì aku. Dìyì adi ke didi dinùlama bimpè bajaalàme pa nkùrusè. Ki mwaba ùdidi dijaalàmìne. Ki bwà cinyì katwèna ne bapròfeta bashuwashùwàlè mu èkèleeziyà leelù ewu, bu mùvwà Agabus to.

107 Ki bwà cinyì, èkèleeziyà leelù ewu, kabèèna—kabèèna nànsha bàneemeka bikolè dyakula dyà mu myakulu pàdi muntu kampànda wàkula to, bwalu mbumvùmvwè bintu byà mafi ne byà lukutukutu, mu mùshindù wà ne kî mbamanyè cidì cîmpe ne cidì cibi mu bwalu abu to.

108 Muumvwijja àdi ànu bu byejeeji nànkù's, muntu kampànda wàmba ànu cintu bwalu mmûmvwe mulombodiibwe. Adi ki ndyumvwija to. Dyumvwija; kî mmuntu wimana wàkula mu myakulu, mukwàbò ùkàtamuka wimana mu tusunsa tukesè ne wàndàmuna cyàmbiye aci to. Pàdi ewu munkaci mwà kwakula, mukwàbò ùdi munkaci mwà kwandamuna ànu pa cibànza, wàmba ku mwàkù ku mwàkù, cyakwidi cîmwècîmwè aci, cintu cyònsò mwomùmwe. Muntu ewu mmufwànyine kwikala wàmba cipròfeta, kàdi kî dyumvwija to. Bàmwè bàdi, dîyì dyà mùshindù kampànda *edi* difila cintu kampànda, didi paanyimà *edi* difila cintu cyà mûngà mùshindù. Ne ewu wàmba mèyì dikumi, mukwàbò wàmba mèyì makumi àtaanu panyimà pàà cyòci aci, bwà dyumvwijja.

109 *Kumvwija* mbwena kwamba ne: “kwamba, mwàkù ku mwàkù.” Pìikalàbi ne n'Dìyì dyà Nzambi, bikèngela dilwa, ku mwàkù ku mwàkù; mulongo pa mulongo, mulongo pa mulongo. Mùshindù awu ngùdi Dìyì ne cyà kulwa.

110 Kàdi ncinyì citùdi bamòne? Bintu byà mafi bipite bùngì! Ne bààkenza cyòci aci, bwalu, pamutù pàà kushàalabò ne Dìyì, bààkacifùnda kuntwaku. Pàdi ànu muntu wènza aci, e kumubìkilabò ne mmwena Mpenta. Kàdi's nudi bamanyè cidì cyènzeka.

111 Pàdi diteeta dilwa, cikondo cyà dyediibwa dyà ku diteeta, díbà adi Dimiinu didi dibanga, didi dileeja ne Dimiinu ndyépi ne cidì kaciyì Dimiinu ncinyi. Mpindyewu, kàyì ùtàngila cyàkenzeka, Abraham wàkashàala ne Dìyì, mulayi awu.

112 Kàdi leelù ewu bulongolodi kabwèna mwà kwenza nànkù to. Ne bàmwè bàà ku nwènu bàna bèètù bàà balùme bàà mushinga mukolè bàdi bàà mu malongolodi awu, nùbenganganà ànu naabò musangu kampànda, s'nudi bamanyè kunùdi bayè. Mbantu bùngì kaayi bàà kunùdi?

113 Ncyèna ngàmba, munda mwà nzùbu emu mpindyewu to, kàdi mbantu bùngì kaayi bàvwà mu bìrò byànyì, mbanganyì bàvwà naanyì, bàmba ne: “Mwanèètù Branham, tudi bamanyè ne aci m'Bulelèlà. Kàdi twètù biipàciibwe kaaba aka, netwènzè cinyì?”

114 Mwanèètù, netwenze cinyì? Elàayi kâpà ku Kâlvariyo, elàayi kâpà ku mulayi, elàayi kâpà ku nkûrusè, nànsha byà kumòna lufù.

115 Kàdi mwômò amu, bàdimù ne bantu bàà batàmbe bwîmpè. Nwamònu anyì? Kàdi cîndi nteeta kwenza, ncyà kwamba ne, aci cîdi ne cyà kupangila. Cîtu cipangilèpàngile ne necipangile misangu yònsò. Kàdi bìdi ne, nànsha wéwè mupangile anyì to, ne Nzambì, lamà Dîyi dyà Nzambì ne mulayi Wèndè, dyàmbedi. Newùteeciibwè kùdiDi.

116 Newùtwe cyâlà ku mikàndà, ne newenze *cikampànda* anyì newenze *cikansanga*. Nànsha byà bibèngangana ne Dîyi, neùbitwe ànu cyâlà. Mbîmpè. Mu mwoyi wèbè amu, udi mumanyè ne mbibi. Aci's cidi ànu kaaDîyi kakesè kapòle aku munkaci mwà kwakula, Dîyi adi. Kabyèna bikèmesha patùdì katùyì mwà kutùngunuka, bwalu cintu kampànda ncyenzèke. Nuvwa batàpùlùke ne kaaDîyi kakesè kapòle aku. Nudi bapàtùke ne lùkàsà lwònsò. Nzambì ùvwa munkaci mwà kunùbikila, kàdi nwènù kapàtuka ne lubilu lwònsò, bwalu makùbàkùbà avwa makungùle, mikenyi yà mvùla myèlè, mukùnà mukankàkàne.

117 Kacyàkanyungishakù Eliyà to, mupròfetà awu. Ùvwa muswè Dîyi adi, dyàmbedi. Wàkamba ne: “Nèndaalè ànu kaaba aka mene.”

118 Bààbûngì menemene leelù ewu, bàvwe babange, mudimu wà dyondopa, difwànyikija dyà musunya, bintu byà mishindù yònsò, ne masaluka adi kâyiku nànsha àmwènèka mu Dîyi dyà Nzambì to. Ncyà bushùwà. Ncinyi ciinè aci? Bivwa bikèngela twètù kwimba musambu awu ne: “Aba bàtù batèkemena Mukalenge. Swâkù bwà mpwekeshè lutàmbishi lwànyì ne nsokè Dîna Dyèbè. Ngánjì kwindila, Mukalenge, too ne pàndi ngumvwa kaaDîyi kakesè kapòlè aku.” Nènku Dîyi adi nedìikale Dîyi dyà mu Mifùndu. Nedyàkule ànu bìpetangana menemene ne Dîyi. Amen. Èyo.

119 Tudi tusangana ne, Abraham paanyimà pàà yèyè mumane kutèkiibwa, kubìikidiibwa bwà kupatuka, wàkatàpùlùka ne bananga bèndè, kutàpùlùka ne dîkù dyèndè, kutàpùlùka ne nzùbu wèndè, mutàpùlùdiibwe ne bilongo byèndè, kuyayè mu buloba bwenyi. Ku diitabuuja yèyè wàkacyènza. Pashìishe, bwalu bwà yèyè wàkacyènza, Nzambì wàkamupèèsha ditengudiibwa, bwà kujaadika ne yèyè ùvwa mwànà wa Nzambì, bwà ne ùvwa muMwitàbuuje bwalu ùvwa wìtabuuja mulayi. Nànsha nànkù, kàvwa mwà, kàakacimòna cyà cifùkìlu to, kàdi wàkajìkula ne: “Cintu kanà cyònsò cidi cibèngangana ne Dîyi dyà Nzambì civwa mashimi.” Nànsha bàmba ne bishindiki bìvwa bilwe búngì bìshi, cidi ànu dishima.

120 Ndi nkìna bwà kwamba eci, kàdi nebikèngele ànu mèmè kucyàmba. Tàngilàayi. Nènku panùdi nwangata bakàji,

nencyàmbe bwà cintu kampànda cidi cimweka ne mèsù, citùdi mwà kumòna, bàdi bàdyàmbe mùdibo ne Nyumà Mwímpè, kàdi kabàyi ne kalolo kakùmjàne bwà—bwà kulekela nsukì yàbò yileepa, kùdi cintu kampànda cidi cyènda bibi mwaba kampànda. Mukàji kampàda wawwàlà cilàmbà cyà muntu mulùme, kàdi ùciwàla, pàdi Bible wàmbe ne: “Ncinyangu kùdi—kùdi Nzambi, bwà mukàji kuvwàla civwàlù cikùmjànyine muntu mulùme.” Kàdi dībà adi wèwè kwamba mùdi ne Nyumà Mwímpè eku wenza nànkù?

¹²¹ Mvwa mwakùle pa cyòci mu Oregon ditùkù kampànda. Kùvwa mukàji kampànda wakamfùdila mukànda munène wa dilènji. Kwambayè ne: “Mwanèètù Branham, udi ne mudimu wà bwambi wà nkèmenu, kàdi udi bushùwà muditwe mu diwùnyanga.” E kwambayè ne: “Mpindyewu, udi wamba bishi bwà. . .” Yèyè ne: “Ntu mvwàla cisalabetà misangu yònsò.” Yèyè ne: “Kàdi udi wamba bishi bwà kubwela mu kaabudimi bwà kutuula ndambù wa—ndambù wa byà mu kaabudimi, kàdi mwíkale ne nkanzu pambidi. Kwènakù wela meeji ne mbifwànyinekù kumwèka bimpè mèmè mwíkale ne cisalabetà pambidi kutàmbe mùdibi mwà kwikala, anyi cisalabetà, anyi ni ncinyi cyònsò, kutàmbe kwikala ne nkanzu pambidi anyi?” Ki yèyè kwamba ne: “Tàngilà, ntu mbànda pa tubalu ku mikùnà ne bansongàalùme pàtùbò babàndakù bwà kudìisha ngombe, ne,” yèyè ne: “Ntu nkabwela mu citùpà cyà buloba mùdi tumwe tutàpe bu mèshi.” Yèyè ne: “Mpindyewu, ne—ne nkanzu pambidi, tumwe ntufwànyì kundyà kummana. Mèmè ne cisalàbetà katwèna mwà kuntàcisha nànsha.”

¹²² Mèmè ne: “Aci’s ncipeepele kupìta ne nsupù mwenza ne mundidimbì wà nzòòlo mufwè nzala’s. Luse wè! Kacyèna ne Dìyi dyà Nzambi pa bwalu abu nànsha dìmwè to. Aci ngwebè mmwènenu wa sungasunga.”

¹²³ Nzambi mmwambè ne: “Dìyi kanà dyònsò edi diikalè mashimi, kàdi Dyèndè diikalè dilelèlà.” Mukàjàanyi ùtu ùlwàta nkanzu. Ùtu ulongolola mu kaabudimi. Aci kacyèna cìmutàcisha to. Nènku, yèyè mwine, mukàji kèna mwà kabwelakana ne musumbà wà bānà balùme bàdi pambèlu pààpa, wènda ùdisha ngombe to, nànsha twamba mwine. Ùdi ne cyà kwikala ku cikuku mu mwaba wèndè. Ncyà bushùwà.

¹²⁴ Bàdi ànu munkaci mwà kukèba pàà kufinukila, kàdi kapèenakù to nànsha kakesè. Dìyi dyà Nzambi nditòòke tòò, ne mukàji udi mulediibwe kùdi Nyumà wa Nzambi neikalè. . . Ne muntu mulùme udi mulediibwe kùdi Nyumà wa Nzambi kàakulekela mukàjèndè wèza maalu mùshindù awu to. CyàkambàYe ncinyi? “Ewu udi ukòsa nsukì yèndè, ùdi ùfwisha mutù wèndè bundù.” Ne bàyèndè ke mutù wèndè. Mukàji awu ùdi wenzangana bundù.

¹²⁵ Bivwa bitàmbe bwímpè memè kupùwa. Èyo. Mpindyewu,

nwamònu's, nwamònu's, byàkùmbanyi. Nudi bamanyè cîndi ngàmba.

¹²⁶ Ncyèna ngamba aci ku budimù to. Piikalàbi ne ndi ncyàmba ku budimù, Nzambi àfwilèku mwoyi wànyì wà mpèkaatù ewu luse; ànyishe mpwekelelèku kwinshì kwà cyambilu eku, nyingalalè.

¹²⁷ Ndi ncyàmba bwalu, balunda bàànyì, ndi munùnangè. Nènku ndi nteeta kunwambila cidì bulelèlè, ne aci's n'Diyi dyà Nzambi. Tudi ne cyà kutèèleja kaaDiyi kakesè kàà Nzambi aku, bwà kudyèla ku cipimu cyà Diyi. Netùpicile mu cikondo cyà diteeta. Àlèluuyàh!

¹²⁸ Nuvwaku bajingùlule ne paanyimà pàà cikondo cyà diteeta aci cimane kulwa, bundeeji bwà mwànà awu uvwa mulediibe mu dikù dyà cyena dingumba anyi? Bu yèyè mwà kutwàla diteeta adi ne kushààla ne dijinga dyà taatù, díbà adi mwànà wa balùme awu bàvwa bàpàtuka nendè ne bàvwa bàmulwàcika cilàmbà, ne pashiishe kùvwa mushingà ùtùndubudiibwa. Nènku mwànà wa balùme awu ùvwa ùtèekiibwa díbà adi mu dikù mùvwàye mulediibe adi amu.

¹²⁹ Ki lutàtu lùdi naalu beena Mpenta bèètù leelù ewu ndwòlò alu. Bàdi ànu bàtùpika eku ne kwàka, ne malongolodi ètù mmafwànyìne kubàkokela eku ne kwàka. Kabèèna bàshààla ne Diyi nànsha.

¹³⁰ Bu nwènù mwà kushààla ne Diyi, díbà adi Nzambi, pa kumòna ne: “Nwènù bashààle munda Mwànyì, ne Diyi Dyànyì munda mwènù,” Dyèndè, Yèyè kèna mwà kuDivila to, NDiyi Dyèndè. Díbà adi nekwikale cikondo, musangu kampànda, díbà dinwangaciibwa ne kutèekiibwa ku luseke, ne kupèèbwa cintu kampànda cidì cishùwashùwàlè, àlèluuyàh, bukolè bwà Nzambi wa Bukolè bwònsò.

¹³¹ Mbwena kwamba ne, Nzambi mmwindile bânà Bèndè, kàdi paabò kí mbaswe kulonda njila to, pàdibo bàfika mu cikondo aci cyà diteeta. Udikù muswè kucitaba anyi? “Èè, èkèleziyà neàngiipate.” Èyo. Ki bwalu mbwòbù abu's. Nànku, ndàaku. Adi kí n'Dimiinu dyà Abraham to. Dimiinu dyà Abraham kadyèna dyènta maalù mùshindù awu to.

¹³² Dimiinu dyà Abraham! Mpindyewu, civwà mwà kubengangana ne Abraham nànsha ciikale cinyi, yèyè wàkashààla ànu ne Diyi dyà mulayi àdi, wàkashààla ànu naadi. Nànsha bàmba ne Sarah wàkalwa, ne bakwàbò bààkalwà, bashiilèshiiàngàne bààkalwa, bintu byònsò, wàkabibala bu ne kabìvwàkù to. Wàkatàngila, kwìtabuujiyè ne ùvwa mwà kumòna mulayi, bwalu Nzambi ùvwa mumulayèwù, ne ki bwalu bwònsò bùvwàku abu. Civwa n'Diyi dyà Nzambi, dyàkashààla ànu munda mwèndè.

¹³³ Pashiishe ki kumwelayè diteeta dyà ndekeelu adi. “Nemmupèeshe bitùpà bibidi, ne kumuteeta.” Mpindyewu,

nyéwù ùkaadi mumanè kupeta mwânà wa balùme awu. Mmumòne ne ùdi nendè. “Kàdi mpindyewu Nêmwambile ne: ‘Bànda ne mwânà awu kuntu kwaka ùmushipe.’ Nènku mwânà awu, pàdiye umòna . . . Neàshipè mwânà awu anyi? Nêmmuteetè mpindyewu.”

¹³⁴ Abraham, ne lulamatu ku Dìyì! Mbishi, paùdi upeta mulayi, mmunyi muwìmanyika cintu aci?

¹³⁵ “Mmunyi—mmunyi muwi—mmunyi muwàtèkemena bwà kwikala taatù wa bukwà matùnga, kàdi pèèbè nyéwù ùkàadi ne bidimu lukàmà ne dikumi ne bitaanù mpindyewu?” Izakà mwànà, ne bidimu bitwè ku dikumi ne binaayi, bidimu dikumi ne bitaanù. “Mmunyi muwikalà taatù wa bukwà matùnga paùkaadi ne bidimu lukàmà ne dikumi ne bitaanù apa, ewu ki mwanèbè mulela umwepelè, ne udi munkaci mwà kushimbula cishindiki cyèbè cìmwèpelè cyùdi naaci anyi?” Amen.

¹³⁶ “Mmunyi mungàacyenza bu mémè mwà kupàtuka mu bulongolodi bwànyì? Mmunyi mungàacyenza bu mémè mwà kwenza *cikampànda*?” Kaa, tèèleja kaaDìyì kakesè kapolè aku ne lwàkù ku Dìyì, Dìyì.

¹³⁷ Wèwè udi wamba ne: “Mvwa mùmvwè dìyì dìngambila *cikampànda*.” Pìikalaci cibèngangana ne Dìyì, kacìvwa Dìyì dyà mukana mwà Nzambì to. Dìyì dyà mukana mwà Nzambì didi dilwa ku Dìyì.

¹³⁸ Dìbà adi Abraham wàkaya kuntwaku kùdi Dìyì, ne Dìyì dipolè, dikesè dyà Nzambì, ku Dìyì dyà Nzambì, ùdi ne cyà kushipa mwanèndè sungasunga.

¹³⁹ Yèyè ne: “Lamà cyanza cyèbè, Abraham. Ndi mumanyè ne udi muNnange mpindyewu. Ne bônso bàdi bàkulonda paanyimà abu, àlèluuyàh, bônso bàdi bàlwà paanyimà pèèbè abu, bàdi baswè kwangata Dìyì Dyànyì, neciikalè Dimiinu dyèbè, ne mwômò amu yèyè neàkòòkeshè ciibi cyà mwena lukunà.”

¹⁴⁰ Mvw’a njinga ngìkalapù ne dìbà dyà kunwàmbila cintu kampànda cìvwà cyenzèke kùkaadi ndambù wa matùkù, nwamònu’s, bwà cìvwà cyenzèke. Kaa, ekèlekèle!

¹⁴¹ “Nedikòòkeshè ciibi cyà mwena lukunà; Dimiinu dyèbè dyalwà paanyimà pèèbè. Abraham, wakubènesha neàbèneshiibwè, ne wakwela mulawu neèdiibwè mulawu.” Yesù wàkamba ne: “Mbitàmbe bwìmpè kukuswikilabo dibwe dyà mpelu mu nshìngù, ne kukwinyijabò mu ndòndò wa mbù.”

¹⁴² Ne malongolodi adi ipata bantu bàà difwànà dyà Nzambì abu aa, bwalu mbatwè ku cyà Bulelèlè, Dìyì, ne Nyumà ne bukolè bwà Nzambì, ne kushààla ne Dìyì, nudi numòna cyàkenzèkà anyi? Udi mwinyijìbwe mu mbù wa cipwàmwòyì.

¹⁴³ “Mbitàmbidile bwìmpè kukuswikilabò dibwe dyà mpelu mu nshìngù mwèbè amu, kàdi kukwinyija mu ndòndò wa mbù, pamutù pàà nànsha kulèndwisha cyanaànà mushàadile wa ku

beela maanyì Aba.” Bôbò abu bàdi cinyì? Dimiinu dyà Abraham didi dishààla ne Dîyi dyà mulayi.

144 Yimwè yà ku èkèleeziyà yètù yidi yikafika too ne ku divila, yidi yivila dyondopa dyà kùdi Nzambi, kabèèna badiswè kàbìdi mu èkèleeziyà wabò to. Ncyà bushùwà. Malongolodi ètù à Mpenta kaàcyèna kàbìdi maswè dyondopa dyà kùdi Nzambi to. Ncinyi aci? Kanwènaayikù numòna mùdi dyabùlù mukwàte mudimu anyi? Mmunyùngùlùke kuntu kwàka ne wènda ùlonda bintu byà mafi byà mùshindù awu. Ànu bantu bàà mamanya à mu mitù bàdi bèèla meeji ne mbàà nyumà, nènku bàdi bàtàngila cyôci aci, ne bàmbà ne: “Tàngilàayi wàwa. Tàngilàayi wàwa.” Mémè ncyèna ntàngila aci nànsha.

145 Wèwè mwikàle Dimiinu dyà Abraham, neùtangilè ku mulayi wa Nzambi, cidì Nzambi mwambè bwà kwenza bwàwù aci. Ki cyôci aci. Dimiinu dyà Abraham, tudi tutàngila ku mulayi. Ncyèna ncyùka bùngi bwà bàdi bàdishinda *elu* luseke ne bùngi bwà bàdi bàdishinda *lwàlwa* luseke to. Mulayi ùdi ùshààla mulelèlà.

146 Bikèngela ùpicilè mu mateeta awu. Nwamònu anyi? Èyowà. Abraham, dyàmbedi wàkateecibwa, ne pashiishe kutwibwayè citampì, dîbà adi ke kupèebwayè mulayi wà ne: “Dimiinu dyèndè divwa ne cyà kukwàta ciibi cyà mwena lukunà.” Ndi muswè aci. Dîbà adi, bàakakwàta dîibi byà beena lukunà bààbò paanyimà pàà bamane kuteciibwa.

147 Bwalu bùdìku mbwà ne, katwèna mwà kutwala diteeta nànsha. Ki cidì cyèna ne malongolodi ètù kaèna mwà kutwala diteeta nànsha. Kí ndiswa dyà Nzambi nànsha. Bwalu mbwà ne, Nzambi mmucibènèshe, kàdi kí ndiswa dyà Nzambi to. Bwalu, nwamònu's, nudi ne musumbà mujimà wà bantu muneemu biikàle ne bisumbù byà mmwènenenu, ne bàdi bàbàkungwija pàmwè ne bàpàtukamù ne bintu bitàmbe bwîmpè bìdìbo mwà kwikala naabi. Bàmwè bàdi bàmba ne: “*Ewu* mmuntu munène. Kwèna mwà kuvila dîyi dyèndè to.” Èè, mùshindù ùmwèùmwe awu ki ùdi èkèleeziyà wa Kàtòlikè muvwijìibwe bulongolodi, cintu cimwècimwè aci, pa musumbà wa beena kwitabuuja bàà mamanya à mu mitù. Beena mamanya à mu mitù, bàdi bàcìtàngila, bàcìnwangaja ne bikondo. Kwèna mwà kwenza nàнку to. Bikwàbò byònsò ndishima pa kuumusha Dîyi dyà Nzambi.

148 Abraham kàakatàngilakù cintu nànsha cimwè to ànu ku mulayi wa Nzambi. Nànsha cinyi ciikàlekù, wàkashààla ne mulayi wà Nzambi.

149 Ki bwà cinyi katwèna tupeta byàbùngi to. Bulongolodi kabwèna mwà kukwàta ciibi cyà mwena lukunà to. Kùdi meeji manèna matelakaja àbùngi muntwamu.

150 Bikèngela kwangata muntu-nkààya, bwà kukwàta ciibi cyà mwena lukunà awu. Udi mwà kucyènza bu wèwè mwà kujinga. Eyowà's, mukalenge.

151 Twànji kuteetaayibi bakesè, bwà tusunsa tukesè cyanààna, bwà kumóna ne bàdi bàshààla mu Mifùndù.

152 Mpindyewu, kùvwa cikondo kampànda kale wàwa mu Babùlònà pàvwàku lu—lupìngù lutèèka, cimfwànyì menemene cyà èkèleeziyà wa Kàtòlikè, ne bònso bàvwa kabàyi bìnamina lupìngù alu to bàvwa ne cyà kwoshiibwa mu cikùtù cyà kapyà. Mpindyewu, cìvwa ditembangana dyà makàndà, dyà ne ní bàvwa ne cyà kwimana, pàvwa Nzambi mwambe ne: “Kwikadi ne tunzambi tukwàbò kumpàla kwàNyì nànsha, anyì kudìsongela lupìngù ní ndwà cinyì ní ndwà cinyì nànsha.” Ki cyàkambà Nzambi ncyòci aci. Diteetangana dyà makàndà kulwadi.

153 Izalèlèlà yònsò kukùlukayè mu cintu aci. Ne pàakadilà mpungi, ne—ne cisanji cyà nshinga yàbùngì kudila, ne ka—ne kashibà kudila, mòna's, bònso bàakapòna panshì kumpàla kwà cimfwànyì eci.

154 Kàdi kùvwa bàsàtù bàà kùdìbo bàkambà ne: “Kashidi twatàmba nkàshàmà.” Bàakumvwa kaaDiyì kakesè kapòle aku, ne kushàalabò mu mulongo ne Dìyì. Cyàkenzàbo ncinyì? Bàakashààla ne Dìyì.

155 Nènkù pashìishe, bóbò—bóbò—bóbò kwamba ne: “Nwènu kanùyì bacyènze to... Netùnùpèèshè mpungà mukwàbò, cyanààna netùnwimànshè mu cikùtù cyà kapyà.”

156 Bóbò kwamba ne: “Nzambi wetù mmukùmbàne bwà kutùsùngila ku cikùtù cyà kapyà aci.” [Katùpà kàà mukàbà wa mèyì munda mutupù—Muf.] “Kàdi, nànsha nànkù, netùshaalè ne Dìyì.”

157 Mpindyewu, mwanèètù, kàdi udi bishi wèwè? “Nèngènzè cinyì, Mwanèètù Branham?” Shààla ne Dìyì. Shààla ne mulayì. “Èkèleeziyà wanyì neùmuke yònsò kùndi.” Shààla ne mulayì. Bàdi ne cyà kufùbidila, bànyeema bàya dinga ditùkù, nànsha byà munyì. Kàdi, Nzambi kadyàkufùbidila nànsha. Shààla ne mulayì. “Èè, nyèwù nzwàmbila, nebàngiipàte.” Shààla wèwè ànu kushàà, ne mulayì. Wèwè shààla ànu ne mulayì. Mpindyewu, bu wèwè mwà kushààla ne mulayì ne kushààla mwaba awu, shààla ànu naabò dībà adi.

158 Ikàlà mu bwobùmwe ne bantu bònso. Kàdi mpindyewu mwab'ewu, mpindyewu, kwàdyàkucimuna mu mungà mùshindù to pa kuumusha kubwela mu bwobùmwe ne bantu bònso. Udi mwenzèjibwe. Mpindyewu, pàdìbo bàtamba kubiipa, bènda masandi, dībà adi wèwè ditole ùmuka kùdìbo. Ncyà bushùwà. Kubwedi mu citùpà cyà buloba cyà mwena lukunà nànsha. Kàdi ntàntà yònsò ùdi ànu ujinga bwà kupeta mwanèènù, abi mbishìilàngàne. Nwamònu anyì?

159 Mpindyewu tàngilàayi, kàdi kwàkucimunaku mmwènenenu wa bulongolodi to, wèwè muntu umwèpelè, to, mukalenge, pàdìbo, ne kanungu kààbò kiimanyika ne: “Tudi twitabuuja *cikampànda*,” citùdilu. Nwènù baswè kufùnda dyènù dilongesha ne: “Tudi twitabuuja *cikampànda*,” kakòselu, bìdi mwà kwikala bishùlàngàne. Citùdilu mbwena kwamba ne: “Tudi twitabuuja *eci*, ne bìvwa bìkèngela nwènù kufika ku *cyôci* ne kutwà cyàla pa dibèji edi, cyanàànà kwàci kwàjiki.”

160 Kàdi wèwè mwambe ne: “Tudi twitabuuja *cikampànda*,” kakòselu, “kusangisha ne byònsò bitùdi mwà kuyiila kùdi Nzambì abi. Tudi badilekèlèle kùdi Nyumà Mwímpè,” dìbà adi neütungunukè, mwanèètù. Èyowà. Aci neciikalè cishùlàngàne mpindyewu.

161 Kàdi, nudi numòna’s, wèwè mwikale naaci cifùnda ne kakòselu, ne Nzambì ùfila cingà cintu cyà citentèkiibwe, cidi cijaadika ne n’Diyi Dyèndè, Bulelèlè, kwèna mwà kunyunga to, bwalu cidi “ncitùdilu.” Aci ncikòse bwalu. Kì mwaba ùdi ba-Lutheriens bafwile ngwòwù awu. Kì mwaba ùdi ba-Méthodistes bafwile ngwòwù awu. Kì Mwaba ùdi ba-Baptistes bafwile ngwòwù awu. Kì mwaba ùdi ba-Presbyteriens bafwile ngwòwù awu. Ne kì mwaba ùdi beena Mpenta munkaci mwà kufwila ngwòwù awu. Ncyà bushùwà. Ncyà bushùwà. Bàdi bafwila ànu mwaba awu, tàngilàayi cyanàànà, bwalu cikaadi—cikaadi cimana kufùnda cyònsò. Kakwèna cintu cinùdi—cinùdi mwà kusàkidilakù anyi kuumushilakù to. Cikaadi—cikaadikù. Kì dilongesa dyènù ndyòdi adi.

162 Ba-Luthériens kabàvwa mwà kwitaba dijidiibwa to. To, mukalenge. Yèyè mmwambe ne: “Mwakàne neikalè ne mwoyi ku diitabuuja.” Kì m’Martin Luther to; kàdi kasùmbù kàakamulonda aku. Ncyà bushùwà.

163 Kì n’John Wesley to; kàdi kasùmbù kàakamulonda aku. Ncyà bushùwà.

Kì n’Calvin to; kàdi kasùmbù kàakamulonda aku.

164 Kì n’John Smith wa èkèleeziyà wa ba-Baptistes, wàkasambila bikolè, munda mwà bufùkù, too ne mwàkafika mèsù èndè ku dyula ne kubwitawu awu to, bwa èkèleeziyà wèndè; ne kukèngelabi ne mukàjèndè àmulombòlè pambèlù ne kumudiisha ne nkutu, ku mèèsà. Kì nyèyè awu to; kàdi musùmbà wà ba-Baptistes wàkamulonda ewu, bulongolodi bwàkalonda paanyimà pèndè abu.

Kì ng’Alexandre Campbell to; kàdi aba bàakamulonda.

165 Kì nkwaaka wa beena Mpeta wa ku cibangidilu, bàvwà ne byònsò bitèkela kaaba kàmwè, ne bàvwà bàbwela mu bwobùmwè ne bantu bònsò abu to; kàdi ntusùmbù twàkalwà e kwamba ne: “To. Twètù tudi *cikampànda*, ne tudi *cikansanga*. Kàdi’s ke tunungu *atu*, nènku kì *cyôci* aci!” (“Bàditàpulula, bimwèka ànu bu ne kabèena ne Diitabùuja to.”) Mwòmò. Ke

cyàkacyenzà ncyôci aci. Ki cintu cibi ncyôci aci. Amen. Ndi ndyũmvwa mutẽdeleedi, mu dindà emu.

¹⁶⁶ Bânà bàà beena Ebèlù abu, paanyimà pàà bamanè kutwàla diteeta, ní bìvwa bikèngela kushààlabò ne Dìyì dyà mulayi, anyi to, bàvwa beediibwe ku diteeta. Ne cyàkenzàbo ncinyi? Bààkawkàta ciibi cyà mwena lukunà. Amen. Bwà cinyi? Bààkashàala pa Dìyì.

Shàala ne Dìyì, Dìyì dyà Nzambi didi dyàkula neebè adi.

¹⁶⁷ Mpindyewu, ngeelèlù yònsò wa meeji wàkamba ne: “Mpindyewu, tàngilà. Babùlònà, kakùvwa kufwànyine kwikala dishiilàngana to. Bwalu, twètù, patùdi twinyika mitù kumpalà kwà cimfwànyì eci, tudi tukuukwila Nzambi, nànsha bishi. Èè, patùdi tucyènza mùshindù ewu, tudi twamba ne cidi mùshindù ewu.”

Cyenzaayi mùshindù ùdi Nzambi mwàmbe.

¹⁶⁸ Ambaayibi túng bu Nzambi mwambe ne: “Mòsà, umusha bisàbaatà byèbè, Mòsà. Wèwè udi pa buloba bwà cijila.”

¹⁶⁹ Yèyè kwàmba ne: “Twasàkidila, Mukalenge. Ndi nkwitabuuja Wèwè menemene. Nentuule ànu cifulu cyànyì pamutù pà kuumusha bisàbaatà. Ndutàtù lwàbũngi bwà kusùlula bisàbaatà byànyì.” Uh-huh. Huh! Kabìvwa mwà kwenda to.

Ùvwa mwambe ne: “Nsàbaata.” Yèyè kàakamba ne “cifulu” to. Cyà bushùwà.

¹⁷⁰ Bikèngela ùlwe, mulongo ku mulongo, cidi Nzambi wamba, ne cilondàngane ne Dìyì Dyèndè.

¹⁷¹ Mpindyewu, paanyimà pàà bamanè kupeta diteeta, bààkawkàta ciibi cyà mwena lukunà cyà kapyà. Kujandulabò ne, pàakayàbo buludì too ne ku ndekeelu, Bashindàmeene pa Dìyì dyà Nzambi, bààkawkàta ciibi. Ncyà bushùwà. Paanyimà. . .

¹⁷² Danyèlè. Kùvwa mukenji mwela, ne mutwà cyàlà kùdi beena Medàayi ne beena Pelèsà, ùvwà kawùyì mwà kushintuluka nànsha, wà ne: “Muntu yèyè ànu mudidinge mutẽdeleeele nzambi mukwàbò, èdiibwe mu bwina bwà ntambwe.” Kàdi Danyèlè ùvwa mumanyè ne Dìyì dyà Nzambi dìvwa, mbwà kuMutẽdeleela ànu Yèyè nkàayendè, ki yèyè kukàngula màdidiishì bwàshì e kutẽdeleela nànsha nànu. Mpindyewu, kàvwaku mukasokòme mu ditumba to. Wàkakàngula màdidiishì bwàshì e kutàngila ku ntempèlù. Kàvwa ne bundu bwà bwalu abu to.

¹⁷³ Ne twètù katwèna baswè kwenza ntẽdeleelu wètù mu dyàlumingu, kàdi mu òmwè kwenza bìngà bintu nànsha. Anyi, kwitabùùjà mu mwoyi wètù cintu cìmwèpelè, kulwa kumpalà kwà muntu mukwàbò kwàmba ne: “Èè, ncyèna mumanyè to. Èyowà, ngeèla meeji ne udi mubingè.” Ikàlà cyùdi aci. Wèwè kùyì cyùdi ne cyàkwikala to, umùka ku cyambilu, pàtukà mu

èkèleeziyà. Ncyà bushùwà. Bwalu, udi cipangishi kùdi byònsò bibidi. Shààla cyùdi aci. Ambà cyùdi witabuuya, dībà adi kwèna ne kwà kutwilà cìmpìngà to. Udi wimanyina ànu ku cìdi cilelelèlè. Muntu yònsò mumanyè diikala dyèbè. Bantu nebàkwanyishè, muntu kanà yònsò ewu.

174 Mukàjì ùdi mwà kwikala mubi wa nkòtòòtò wa mupange ne mwa kubìipa. Ùdi mwà kwikala mule, munène wa katumbi, mwìpi, wa kanyikanyi, wa nsuki mifike, wa mèsù makùnzùbile, wa mèsù à bleu, wa mèsù mafìkùlùke; òmwè, ewu mushindù, ne dikwàbò mungà mùshindù. Kàdi mukàjì awu yèyè mwikàle mukezikè, inàbànzà, kakwèna muntu mulùme mu ditunga dijimà amu udi kàyì mwà kumutùùdila cifulu ku mutù nànsha, yèyè ne katùpà kàà bwànà bulùme munda mwèndè. Ncyà bushùwà. Bwalu, mukàjì awu—ùdi ùpàtula cìdiye, ne balùme bàdi bàcyànyisha.

175 Ki mwikala Nzambì ne cyà kwanyisha muntu wikala cìdiye aci, anyi muntu udi ujìkula bwena Kilistò. Twikalàayi beena Kilistò, buujìlwe tètè ne Nyumà Mwìmpè, biikale ne Dìyì dyà Nzambì, anyi túbùpwaayi mwoyi. Ncyà bushùwà. Bwalu, cyanaànà, udi ulwa mwena lubombo, kàdi mwikale ne nsòmbelu mushiilàngàne. Bantu bàkumòna upàtuka ukaja maja, ne unwà mfwankà, ne bintu byà mùshindù awu, cikòlà udyàmba mùdi mwena Kilistò, dībà adi, wamònu's, udi utèeka dibwe dyà cilèndwishi mu njila wa bakwàbò.

176 Nwamònu nwènù bakàjì, mìngà misangu, mùshindù ùsòmbèlabo bàkòsa nsuki yàbò ne bàvwàla ne bènza maalu mu tunkazu tukesè twà kale tùdìbo baywàle etu, bàmwèka bu saucice muuvula cizubu anyi cikampànda, bàpàtuka mu mùsèèsù, bènda banyùngùluka, kalundu kàà cisàbàtà bule *ebu*, bènda bàdinyonda bàpweka ne mùsèèsù. Ki beena Mpenta abu anyi? Nènku ma—maèkèleeziyà makwàbò àdi àmba ne: “Bàdi bàlaka mukana bàmba mùdìbo ne cintu pààbò byanza bitupù.”

177 Wèwè udi mutwìbwe citampì ne cimanyinu kùdi Nyumà Mwìmpè. Kwèna mu nzùbu wa cijìdì cyà maja dilòòlò edi mujìngila mabòko kùdi mwànà mulùme kampànda, udi kàyì bàyebè nànsha; dilòòlò didì dilondà, kàdi kulwa mu èkèleeziyà kuja maja mu citanda mwònsò. Aci kì mbwena Mpenta nànsha. Aci's ndubombo. Aci's mmbukooyà.

178 Ncyènà nnwambilabi nwènù nangananga to. Kàdi, nudi numòna ne, mikàbà yà mèyì yidì yìkwàciibwa mwab'ewu eyi yidì yìya pa buloba bujìmà, pa nànkù ndi ànu bu udi uyiisha buloba bujìmà. Pàndì ngùmva Nzambì wàmba ne: “Ambà cintu kampànda,” Ndi ànu ncyàmba, bwalu ncyèna mumanyè ne cìdi cìyà penyì to. Mbwalu Bwèndè bwà kucyùka bwalu abu. Shààla wèwè ànu ne Dìyì. Ncyà bushùwà. Èyo.

179 To, Danyèlè kàwva muswè kutwa mpàla panshi ku mukenji wàbò awu nànsha, nànsha bòbò bamwìpàte mu bulongolodi

bwàbò anyi to. Yèyè wàkashààla ànu ku dididiishi, ne wàkashààla ne Dîyi dyà Nzambi. Yèyè kààkaDyùmvwà bundù to.

¹⁸⁰ Cyàkenzekà ncinyi? Kumwelabò mu bwinà bwà ntambwe, kàdi kukòòkeshayè biibi byà nyama yà ntambwe. Bwà cinyi? Butùmbi's wè! Bwalu Nzambi mmwambè ne dyèndè... "Dimiinu Dyèbè nedikòòkeshè ciibi cyà mwena lukunà." Mulwishì nànsha yèyè wa bishi, nwénù nudi bakwàte ciibi. Kaa, mmisangu búngì kaayi yitùdi mwà . . . ?

¹⁸¹ Tàngilàayi Mòsà, wènda ùlonda mu njila wa méyi matùma à Nzambi, kupwekayè mu Èjiipitù, bìvwa bìmwèka ànu bu ne bintu byònsò kabivwa byènda bìmpè to. Úvwa ne batentudi kampànda bàakayà nendè. Kupwekaye ne ndambu wa—wa bimanyinu, bwà kuleeja ne yèyè úvwa mutùmìbwe. Kwelayè nyòka panshì, ne bikwàbò byà mùshindù awu.

¹⁸² Ki batentudi aba pwàà, kwelabò yàbò pààbò panshì. Cìvwayè mwà kwenza ncinyi? Cintu nànsha cìmwè. Nzambi kààkamwambilakù ne nebènzè nànkù to. Úvwa muswè kuteeta Mòsà. Yèyè nguvwa mwan'yishile Yane ne Yambèlè bwà kwelabò yàbò nyòka panshì, ànyi àbò makombo's wè.

¹⁸³ Pa nànkù s'ki Mòsè awu mu njila wendè wa mudimu. Kwelayè dikombo dyèndè panshì. Dyòdi e kwandamuka nyòka. Yèyè ne: "Tàngilàayi aci, Pàlò. Ki cìvwa Mukalenge wanyì mungambìle bwà kulwa, kwenza kumpàla kwèbè."

¹⁸⁴ Pàlò kwambayè ne: "Lwàyi apa, Yambèlè ne Yane." E kwelabò makombo àbò panshì. E kwandamukawò nyòka, cìvwa Mòsè mwenze aci.

¹⁸⁵ Kwìsù kwàkamukúnza anyi? To, mukalenge. Úvwa ànu mwitàbùùje ne Nzambi ngwàkamutùma. Wàkashààla ne mulayi awu. Kàdi cyàkenzekà ncinyi?

¹⁸⁶ Adi's ndìbà dyùdi usanganyiibwa kumpàla kwà bisangilu byènú byà muyiiki. Kwìsù kwèbè nkufwànyìne kukukúnza, kakesè. Shààla ne Dîyi.

¹⁸⁷ Cyàkenzeka ncinyi? Dyàkàmwè, nyòka munène wa mpyàpijà wa Mòsè awu kulwayè e kuyìmina bikùù. Nzambi kushindika. Paanyimà pàà diteeta dyèndè, kwambayè ne: "Ndi muswè ne wèwè, ku cimanyinu eci, ùlekelà bânà abu bàpàtuke bàye dyàmwàmwa. Ndi muswè bwà ubàlekèlè bàalukila kwàbò, mu buloba bwàbò. Nzambi mmupwèke bwà kwamba, mmuntùme munèemu bwà kubàpikula. Ndi muswè bwà bàalukilè." Wàkadyèla panshì kuntwaku.

¹⁸⁸ Kaa, diteeta kulwadì. Mòsà, newènzè cinyi, kukùdimuka, kwasa lwendu, kwamba ne: "Èè, s'ndi mufwànyìne kwikala mutùpàkàne" anyi? To, mukalenge.

Mòsà wàkiimana mwaba awu mene ne: "Nzambi wàkamutùma ne mudimu ewu." Butùmbi's wè!

189 Pàdì Nzambi wàmba cintu, shààla wèwè naaCì. Cìdì cyènzekà nànsha ciikàle cinyi, shààla wèwè naaCì. Pàdìbo bàkwipata bàmba ne: “Katwàkwelangana neebè dibòko to, katwàkwenza *cikampànda*,” shààla naaCì.

190 Mòsà wàkashààla ànu naaci. Cyàkenzeka ncinyi? Wàkakwàta ciibi cyà mwena lukunà wendè. Alèluuyàh. Dyabùlù kwambayè ne: “Nengàalabajè Mbú Mufwè kumpàla kwènù,” kàdi wàkabuululuka bwàshì. Kabàvwa mwà kubàlama mu Èjiipitù kàbìdì ntàntà mule to. Wàkakwàta ciibi cyà mwena lukunà. Bwà cinyi? Bwalu wàkashààla ne mudimu ùvwà Nzambi mumutùme nawù. Méyì matùma à Nzambi, wàkashààla ne Díyì dyà Nzambi ne wàkakòokesha biibi byà mwena lukunà.

191 Yoshùwà, paanyimà pàà yèyè mumanè kupicila ku diteeta. Ùvwà kwinshì kwàka, pàngàpa, bowèle basabùka Yadènè, yèyè ne Kalèbà, ne batentekedi. Pàakalukilàye ku Yadènè, e kutwàbo makàsà ku Kaadèsà-Baanèa. Ki bònso bwàbò kwambabò ne: “Kaa, twètù ànu batwàdije, aci necikosololè malongolodi ètù tutùpàtutùpà. Katwèna ànu mwà kubwelamù nànsha.”

192 Nyumà awu kàtu ùfwa to. “Kaa, katwènakù mwà kwikala ne Cyòci aci to. Twètù balongesha Aci kùdì bantu bèètù, netwènzè cinyi? Tudi bafwànyine kwela pàmwè ne cyàbìbìdì cyà balami, mu èkèleeziyà ewu, pambèlù. Mbasèlàngane misangu yìbìdì, anyi yisàtù. Netwènzè cinyi? Twètù aba, mòna’s, bu twètù mwà kwambila bakàjì bèètù ne bìvwa bikèngela bwà kwikalabò ne nsukì mile, nudi bamanyè cìvwàbo bafwànyine kwenza anyi? Bàvwa bafwànyine kupàtuka mu èkèleeziya. Kàdi citwènzà ncinyi? Mòna’s, tudi bafwànyine kubadiibwa bu bantu bàà cìkùlùkulu’s.” Yesù ùvwà wa cìkùlùkulu, pèndè. “Katwèna mwà kwenza aci nànsha. Katwèna mwà kwenza aci nànsha. Mbikolè be bwètù twètù.”

193 Nudi bamanyè kùtù mwena kwitabuuja wa ku mikàlu ùkafika. Ebèlù, nshapità mwi6, ùdi ùmvwija cyòci aci. “Ewu ukàvwa mukenkeshilà kale, muvwijìbwe mwabanyanganyi wa Nyumà Mwìmpè, kàdi kudishìndayè, bwà kujukulukayè kàbìdì.” Wàkafika ku mikàlu aku kàdi kubènga bwà kusabuka dyàmwàmwa, ki bwalu mbwòbù abu, mubènge bwà kwitabuuja ne kasukì.

194 Bwalu, Cyàkenzà Kaalèbà ncinyi? Cyàkenzà Yoshùwà ncinyi? Wàkamba ne: “Twètù tudi batàmbe kwikala ne bukolè bwà kubùkwàta.” Mbwà cinyi? Bààkashààla ne cìvwà Nzambi mulayè.

195 Mòna’s, kwambabò, bakwàbò abu bààkamba ne: “Èè, mbale bàà mfyondo. Mbadinjìdile bònso mu lumbu. Bàdi mùshìndù *kampànda*. Mòna’s, twètù katwèna mwà kukiminangana naabò to, nànsha byà kumòna lufù.”

196 Yoshùwà kwambayè ne: “Tudi ne dikùmbànyina ditàmbe ne dyà kucyènza. Pùdikilàayi, nwènù cisàmbà! Pùwaayi! Shikàmaayi panshi!” Amen.

197 Ndi nnwambila ne, diitabuuja didi mu cintu citambe bunène, pàdidi dishindameena pa Dìyì dyà Nzambì. Yèyè kèna uciina dībà adi to. Diitabuuja didi ne myòsà mu cyàdì, ne mapùndà manène. Dìdi dyàmba ne: “Bwikila mukana!” Cintu cikwàbò cyònsò cidi ciditùnyina mu ditumba, mmwòmò, pàdì Nzambì wàkula. “Nwènù bashààle munda Mwànyì, ne Mèyì Àànyì munda mwènù, nwàmbè cinwàsà aci.” Ki bwalu mbwòbù abu’s. Kaa, mèmè ntu munangè aci. Hum!

Ba démons nebàzakale, ne bangènzàmpèkààtù
nebàtabuluke;
Diitabuuja mu Yèhowàh nedìnyukushè cintu
kanà cyònsò.

198 Mmunyi mùdì mwà kwikala ne diitabuuja paùdì mumanyè ne kwèna ukwàta mudimu, kwèna wendela mu Dìyì Dyèndè to, paùdì mumanyè ne kùdi bintu byúvwà ne cyà kwamba kàdi kùyì ubyàmba to? Kùdi bintu byúvwà ne cyà kulongesha kàdi kùyì ubilongesha to. Kùdi bintu muntwamu byúdi kùyì mwà kwamba to, nènku mmunyi mùdì mwà kwikala ne diitabuuja paùdì mumanyè ne udi mupìile?

199 “Pìikalà mwoyi wètù kawùyì wùtùpìisha to.” Ki bwalu mbwòbù abu’s. Ki bwalu mbwòbù abu’s. Kàdi shààla ne Dìyì adi, mwaba ùdì cintu nànsha cimwè kaciyì cìpìishìibwe to. “Kakwèna dipìila kùdi aba bàdi mu Kilistò Yesù, bàdi kabàyi bènda bilondèshìle mubidi to kàdi bilondèshìle Nyumà.” Nyumà ngudi ulombola ne Dìyì, bwalu Nyumà udi mwà kupàtukila ànu mu Dìyì, bwalu Dìyì Dyèndè n’Nyumà. Ne Ùdi ànu mwà. . . Nyumà mulelèlè wa Nzambì ùdi mwà kwakula ànu Dìyì dyà Nzambì. Kaa, ekèlekèle! Ekèlekèle, ekèlekèle!

Umùkaayi, nwènù maalu a pa buloba. Sàtaanà, tùlekèlè.

200 Kùcìinyi to bwà kwambila mukùnà ewu ne: “Tentèmùkà.” Cyambàayi. Shààlaayi mwaba awu, mònaayi mudìwu wènda ùvingutuka. Ncyà bushùwà.

201 Kàdi wèwè ne dipishiibwa kanà dyònsò muntwamu, mbitàmbe bwìmpè wèwè—mbitàmbe bwìmpè wèwè kutùkijila. Nyèwù udi ànu munkaci mwà kulàbakana cyanàànà dībà adi. Kwèna wamba bulelèlè to. Kwèna wamba maalu àdi àkèngela wèwè kwamba to. Èyo.

202 Tudi tujandula dībà adi ne Yoshùwà, paanyimà pàà yèyè mumanè kupicila ku diteeta adi, wàkamòna cileejì cyà buloba bwìmpè, ne wàkiimana kwàka ku Kaadèsà-Baanèà ne kudyula bònsò bwàbò, e kwambayè ne: “Tudi batàmbe kwikala ne bukolè bwà kubùkwàta. Twètù tudi mwà kubùkwàta.” Kiipàcìlè kàvwa cinyi? Kusabuka dyàmwàmwa.

203 Mmwènu wa Mòsè ùwva cinyi? “Kuleeja cimanyinu eci ne kupàtula bàna.” Kàdi byàkamwèka ànu bu ne bìvwa bipangile. Kàdi yèyè wàkashààla ne Dìyi, ne ciibi cyà Mbù Mufwè kacivwa mwà kumukwàta to. Wàkaya buludì kupicilamù. Wàkakwàta ciibi cyà mwena lukunà.

204 Yoshùwà, mutàngile ku mulayi wa Nzambi, wàkamba ne: “Twètù tudi batàmbe kwikala ne bukolè bwà kucikwàta.” Ncyà bushùwà. Nèku pàakapwekàye ku Yadènè, cyàkenzà Yadènè ncinyi? Wàkashìya njila. Amen. Ki cyòci aci. Wàkakwàta ciibi cyà mwena lukunà. Yadènè awu ùwva ùmupangisha bwà kusabuka ne kukangata mulayi awu. Kàdi pàakapwekàye kuntwaku, ùwva Dimiinu dyà Abraham. Bwà cinyi? Yèyè wàkiitabuuja Dìyi dyà Nzambi. Ki mùshindù ùmwèpelè wùdì mwà kwikala Dimiinu dyà Abraham, ngwà kwitabuuja Dìyi dyà Nzambi. Kàdi dîbà adi cyàkenzàye ncinyi pàakapwekàye mwaba ùvwàye mudìlongolole bwà kukwàta mwena lukunà awu? Nzambi kunzululayè ciibi, ke yèyè kucikwàtayè, kucyàngatayè, e kuya dyàmwàmwa.

205 Cikondo cyà mvità yà kumpàla, ndululu wèndè wa kumpàla uvwayè mupete naabù, bimanu bìvwa bitàmbe bunène mu mùshindù wà ne bàvwa mwà kunyemeshila màkalù à lubilu à mvità pamutù pààbì apu. Mmmunyi mwàbwelàye bwà kubikwàtàyè? Bàakamunyema, kwalukila munda. Ke cyènzà mwena lukunà, yèyè pèndè. “Kàdi nenùkwatè ciibi cyà mwena lukunà.”

206 Yèyè kwamba ne: “Mukalenge, cìndi ne cyà kwenza ncinyi?” Yèyè kunyunguluka, mu mapingaja kampànda, munkaci mwà dyelangana meeji. Wàkamòna Muntu mwimàne ne mwelè Wèndè wà nkànzà mupàtula mu cimàngà. Yoshùwà kupulula wèndè mwele wà mvità, kwambaye ne: “Wèwè udi bwètù twètù anyi? Anyi Wèwè udi bwà mwena lukunà wetù?”

Yèyè ne: “Mémè ki Kapiteena kàà cilwilu eci.”

“Cìndi ne cyà kwenza ncinyi?”

207 “Cinyungululukaayi, misangu dikumi ne yisàtù. Elàayi mpungi. Nenùkwatè ciibi cyà mwena lukunà.”

208 Cyàkapòna panshì. Èyowà’s, mukalenge. Bwà cinyi? Yèyè ùwva Dimiinu dyà Abraham, òvwà dilamè Dìyi dyà Nzambi adi. Wàkakwàta ciibi cyònsò cyàkalwà kùdiyè. Ncyà bushùwà menemene.

Dìbà dikaadi dyènda diya. Bìkèngela ngiimanyike.

209 Tàngilàayi, bilòbo byònsò byà mushinga mukolè ebi, ndi ne dibèji dyùle tètè nàabù bafùnda mwaba ewu. Kàdi bilòbo byònsò byà mushinga mukolè ebi, bintu byàkenzàbì abi, ndekeelu wa byònsò byàkafwà.

210 Kàdi pashìshe kulwakù Dimiinu dilelèlè dyà diitabuuja, Dimiinu dyà Bukalenge dyà Abraham, Yesù, mulayi. Abraham

wàkapeta Izàkà, bushùwa, bilondeshila mubidi, kàdi Dimiinu dilelèlè kadivwa mu ndongolwelu wa bulongolodi abu to. Divwa mmu mulayi wa Dìyì dyà Nzambì, wà ne Ùvwa mwà kumuvwija taatù wa matùnga, kì nku Izàkà to, kàdi nku Dimiinu dyà Bukalenge, Yesù. Ùvwa n'Dimiinu dyà Bukalenge, divwà, mu bushùwà bwà bwalu, Dimiinu dyà Abraham, Yesù, kàvwa mwena Yudà to, anyi Kàvwa wa bàà Bisàmbà byà bendè to. Ùvwa Nzambì. Nwamònu anyi? Kùdi. . .

²¹¹ Nwênù beena Kàtòlikè bàdì kaaba aka, mwoyi wènù ùbèneshiibwe. Kàdi panùdì nukukwila Màriyà bu nzambì mukàji, bwalu bwenù bùdì bìshi, twamb'eku twamb'eku? Màriyà kàvwa cìngà cintu to ànu mukàji. Nzambì kumusungula. Ùvwa cyamù cyà ditooyishilamù. Kwàjikì. Cyamù cyà ditooyishilamù, aci ki cìdì mukàji, kàdi ùdì ùkwàta mudimu pàmwè ne dimiinù dyà mulùme.

²¹² Kàdi, ndisangisha disambàkàne dyà balùme ne bakàji, kàdi ndi ne cyà kwamba eci bwà nùmvwàkù, cìndì ngàmba. Mpindewu, nutu nutèeleja ngàngàbukà wenù—wenù, kàdi mèmè ndi mwanèènu. Bushùwà menemene, nudi mwà kuntèeleja.

²¹³ Màriyà kàvwa ne bungungu mu Kilistò to. Kakùvwa majiyà à disangila dyà mulùme ne mukàji pàakamubwikilà Nyumà Mwímpè ne mundidimbì wèndè apu to, nànsha kakesè. Kàdi Nzambì wa Bukolè bwònsò, Mufùkì awu, wàkafùka kabulu kàà Mashì ne bungungu. Hum! Bu cìikala bungungu bufùme kùdì Màriyà, dìbà adi bafwè kabèèna bàbiika to.

Butùmbi's wè! Aci cìcìdì cìfùma ku dimvwila. Neidi ncibàkwilakù.

²¹⁴ Nànku nwênù bàmbè ne kakwèna dishiilangana to, ne citùdì twenza, dìbà adi bwà cinyì Nzambì ùdì ùtwàmbila bwà kudikànda ku bintu bibi? Bwà cinyì Nzambì wàkabiiisha mubidi wà Yesù, byôbi kabiyi nànku? Pa nànku, nudi numòna's, kakùvwa mwà kwikala mukàji mulamàkane mu cyôci aci to. Bu ne ùvwaku, dìbà adi mubidi Wèndè wùvwa ùfùmina kùdì mamwèndè, Màriyà, bwalu yèyè ùvwa musangile ku dibwikidiibwa kùdì mundidimbì wà nyumà wàkamufikisha ku—ku dipàtula bilùma, nènku's mbyà bibì. Nyumà Mwímpè ku diimiciibwà kadìyì katòba, àlèluyàh, ki mwaba awu Kufùkayè ne bilùma byà mulùme ne mukàji byònsò bibidì.

²¹⁵ Yesù wàkamubiikila ne “mamwèndè” anyi? Cìsangànaayibi mu Mifundu tùng. Wàkamubiikila ne “mukàji.” Àlèluuyàh! Mukàji! (Aci's ncifikilakù's. Ki bwà cinyì cìdì cìcyènza mùshindù wùdici cyènza awu.) “Mukàji, tàngila mwanèèbè.” Ntántà wa kilòmèètà mùliyò mujimà pabwìpì nendè kutàmba mùvwàye Yèyè.

²¹⁶ Yèyè ùvwa Nzambì. Kàvwa ní mmwena Yudà anyi wa bàà Bisàmbà byà bendè to. Ùvwa Nzambì, musunya ne mubidi,

Nzambì musòmbèle munda Mwèndè. Nzambì musòmbèle mu mâyi à mukàji anyi? Kàvwa mwà kucyènza to. Mâyi à mukàji awu àvwa ne cintu kampànda cyà dyenza ne wètù musunya. Kàdi cìvwa Mashi ne bilùma, byàkabwikila Nzambì ne mundidimbi.

217 Ûvwa mwà kucitèèka pa cikuuku bu Yèyè muswè. Èyowà's, mukalenge. Ûvwa mwà kucitèèka mwaba wònsò ùvwaye muswè awu.

218 Wàkabitwàla bwalu mukàji ùvwa mu cibùlà. Ke kulwaku Mwànà wa Nzambì udi ne mwoyi wa kàyì katòba mulela kabiyi ku disangila dyà mulùme ne mukàji, mufùkiibwe, mulela kùdi virgò, byònsò bibidi mubidi ne musùukà.

219 Bwà cinyi Davidi wàkamba ne: “Ncyàkumòna wa Cijila Wanyi. . .ncyakulekela wa Cijila Wanyi àmonè dibola to, wa Cijila Wanyi ùmòna dibola. Anyi Ncyàkulekela musùukà Wèndè mu ifèrnò”? Davidi ngwàkamba nàнку. Nwamònu anyi? Byònsò ne musùukà, mubidi, ne nyumà, byàkafùkiibwa kùdi Nzambì, ku Yèyè.

220 Mukàji awu kàvwa maamù to, ùvwa mukàji. Ndi ngùtabuuja ne ùvwa mukàji mwìmpè, wa cijila, kakùyì mpatà to. Kàvwakù mwà kwikala cyamù cyà ditooyishila nànsha, Nzambì kàvwa mwà kwikala musungule cyamù cyà ditooyishila cyà manyaanù nànsha. Nzambì yèyè mwà kuswà, ndi nyiisha pa cyòci eci dilòlò edi. Kàdi—kàdi ngàmba ne: “Cyamù cyà kale cyà manyaanù cyà ditooyishilamù bwà kutwàla Wèndè—Mwan'Èndè pa buloba anyi? Wàkasungula virgò, uvwa kàyì mumanyè mulùme to.” Kàvwa nànsha mupàtùle mâyi to, anyi ní ncinyi cikwàbò to, pààkamubwikila Nyumà Mwìmpè ne mundidimbi apu, bwalu, Nzambì, mu njila Wèndè wa kàyì katòba, kàyì mikàlù awu, wàkafùka munda mwèndè, musùukà, mubidi, ne Nyumà wa Yesù Kilistò. Ncyà bushùwà. Yèyè ùvwa Mwànà wa Nzambì mulela kùdi virgò.

221 Ciinè aci cyàkenza cinyi? Cyàkavingutula ciibi cyà mwena lukunà. Àlèluuyàh! Yoyòyò! Eci cidi cyènda cilwa cilenga cilayà, bwànyi mèmè. Tàngilàayi. Bwà cinyi? Wàkavingutula ciibi cyà mwena lukunà ànu mwaba awu mene, bwà yònsò udi mulediibwe pa buloba ebu ku dijinga dyà disangila dyà mulùme ne mukàji, kàvwa mwà kuya mu Dyulu to bwalu disangila dyà mulùme ne mukàji ki dyàkatwàdijà cyòci aci ku cibangidilu, mu budimi bwà Edènà, mòna's bòbò kudibwikila nkàayaabò. Pààkenzàye cyòci aci, wàkakòsolola cintu aci bitùpa bibidi ànu mwaba awu, ne kukwàtayè ciibi cyà mwena lukunà. Ku cinyi nàнку? Wàngata Dimiinù dyà Bukalenge dyà Abraham, ànu musangu wà kumpàla menemene awu, kucizaza too ne mu ndòndò. Dimiinù dyà Bukalenge dyà diitabuuja ne mulayi, kadìyi diimiciibwe dyà kùdi Màriyà to, kàdi dyà kùdi Nzambì, dyàkavingutulà biibi. Ki cyòci aci's, cidi cilekelà muntu ùpicila mu mushikù wà mbelu. Butùmbi kùdi Nzambì's wè!

222 CyàkenzàYe ncinyi? Dìbà adi wàkawkàta biibi byònsò byà mwena lukunà. Wàkawkàta ciibi cyà mabèèdi. Bubèèdi kabùvwa mwà kusanganyiibwa mu Bwikadi Bwèndè nànsha. To, mukalenge. Ni ncinyi cikwàbò kacivwa mwà kusanganyiibwa mu Bwikadi Bwèndè nànsha. Lwendu lwà madilu kalùvwa mwà kwimana mu Bwikadi Bwèndè to. To. Ncinyi cyàkenzàYe?

223 Yoshùwà wàkafwà. Mòsà wàkafwà. Bakwàbò bònsò bàakafwà, kàdi kí n'Dimiinu dyà Bukalenge edi to. Lufù kalùvwa mwà kwimana mwaba ùvwà Mwoyi ùsanganyiibwa to.

224 Mukàji wa ku Nayìnà awu, mupàtùke ne mwanèndè wa balùme. Kumwimanyika wàmba ne: “Bika, mwanàanyi wa balùme.”

225 Mwànà wa bakàji uvwa mufwè awu, mwànà wa bakàji wa Yayilò awu, Yèyè kutùma dîyi dyàmwàmwa mu buloba bùvwà kabùyi bumanyike mwàmwa, wàmba ne: “Mwanàanyi wa bakàji, bika.”

226 Lazàrò, mufwè matùkù ànaayi ne mubidi wèndè mubolè, ne musùukà wèndè mumanè kupàtukamù, munda mwà matùkù ànaayi. Yèyè ne: “Lazàrò, pàtukà.” Butùmbi's wè!

227 Ki Yèyè awu. CyàkenzàYe ncinyi? Wàkakòsa bitampi byà bintu byònsò. Àlèluuyàh!

228 PàvwàYe ne cyà kufwà dîbà adi, Kàvwa mwà kulama mwoyi awu to. Kàvwa mufwànyine kwikala mufwè to, kàdi bìvwa bikèngela bwà Yèyè kufila mwoyi awu. Ne pàakafilàye mwoyi awu, Wàkafwà lufù. Ne musùukà Wèndè wa mushinga mukolè, mùdì Bible mwambè, wàkapweka mu ifernò, bwà kwangata kaaba kàanyi ne kaaba keèbè. Dimiinu dyà Bukalenge dyà Abraham! Cinyi? Yèyè ùvwà Dimiinu dyà Bukalenge. Kaa, butùmbi's wè!

229 Mpindyewu twètù tudi Dimiinu dyà Bukalenge, cinyi, didi dishààla ne Dîyi, ànu menemene mùvwàYe amu. “Bwalu ku cibangidilu kwàkadi Dîyi, ne Dîyi dyàkadi ne Nzambi; ne Dîyi, dyàkavwijiiibwa mubidi, ne dyàkasòmbela munkaci mwètù.” Kanwènaayikù numòna mwaba ùdì Dimiinu dyà Bukalenge dilààdile anyi? Dimiinu dyà Bukalenge ngedi didi dishààla ne Dîyi adi.

230 Nwènù bapòyòyonge bàdì baswè kudyà cibàngà ne dyabùlù, ne myòdelè yèndè yà bukwapànu. (Ncyènà nnwàmbila nwènù bàdì apa aba to.) Pambèlù pààpa, nwènù bayiishi bàdì bamanyè ne nudi nuyiisha ne matùkù à bishimà akaadi mapite, nuyiisha ne kakùtu cintu pààci ne dibàtiiza dyà Nyumà Mwîmpè to, bundu bwènù, ne nudibiiikila pèènù munùdì Dimiinu dyà Abraham.

231 Dimiinu dyà Bukalenge didi dishààla ne Dîyi. Dimiinu dyà bukcalenge, kadiyi dilela kùdì muntù to, kakùyi cintu nànsha cimwè cyà kùdì mulùme anyi mukàji to. Mukàji ng'èkèleeziyà;

cintu nànsha cimwè cyà dyenza ne èkèleeziyà to. Màriyà kàvwa ne cyà dyenza ne Dimiinu adi nànsha. Nànsha èkèleeziyà pèndè, udi ubiikidiibwa bulongolodi awu, kènà ne cyà dyenza nànsha cimwè ne Dimiinu to. Mmulediibwe kùdi cinyi? Kí nkùdi bulongolodi kampànda to, kí mMethodiste, Baptiste, Presbytérien, Kàtòlikè, Luthérien, ne bikwàbò to.

²³² Kàdi, mulela kùdi Dimiinu dyà Bukalenge dyà mulayi wà Nzambi, ki yéyè udi ukwata ciibi cyà mwena lukunà awu. Cikaavwa cimana kumukwàcila. “Bwalu binwàshààla munda Mwányi, ne Díyi Dyányi munda mwènù, lòmbaayi cinùdi baswè, nebànwenzèleci.” Ki bwalu mbwòbù abu’s. Mmulayi. Úkaadi mumanè kwenjiibwa.

²³³ Musùùkà Wèndè wa mushinga mukolè wàkapweka mu ifernò, múmvwà mèmè ne cyà kuya amu. Kàdi mu ditùkù diisàtù adi. . . Shimishòònà wakambula ciibi cyà cimenga aci paanyimà, kàvwa ne cintu nànsha cimwè cyà dyenza naaci to. Wàkakwàta biibi byà ifernò, biibi byà lukità, ne bikwàbò byònsò. Kàakacyàmbula kubànda naaci pa mukunà to, kàdi Wàkacivìngutula. Àlèluuyàh! Wàkakwàta ciibi cyà mwena lukunà.

²³⁴ Byuyuyua bìvwà byùle ne bukolè bwà dyabùlù, kuulu, mu mùshindù wà ne Banjèlò anyi cintu nànsha cimwè kacivwa mwà kupweka panshi nànsha. Kakùvwa mwà kwikalakù dyakwilangana nànsha òmwè to, bwalu mashi à mbuji kaàvwa mafwànyine kuumusha mpèkaatù to. Kàdi Mashi Èndè sungasunga ngàakuumushà mpèkaatù.

²³⁵ Ne Wàkabànda Muulu, e kuya ne bupika ku bupika. Wàkapèèsha bantu mapà. Mpindyewu, yònsò wa ku Dimiinu dyà Abraham udi muswè kufuta mushinga, bwà kupweka ne kunyingalalabò ku mpèkaatù yàbò, kubàtiijibwa mu Dìna dyà Yesù Kìlistò bwà dilekelediibwa dyà mpèkaatù webè, kwikala muwùjiibwe ne Nyumà Mwimpè, ne kutwala diteeta.

²³⁶ Ne pàdìbo bàpàtula byà pa buloba munda mwèbè, bintu byònsò bikaadi biyè, bintu byònsò byà bibi, bintu byònsò bidì bimwèka ne mbyà bibi abi, bu mùdi bakàji ne nsuki yàbò ayi, balume ne kwenza kwàbò kwà maalu à macimbu aku, ne maèkèleeziyà ne malongolodi àwò, ne—ne mpaasàtà wengeleka balami bèndè, ne—ne bintu byònsò byà mùshindù awu. Musùmbà kampànda wà cintu kampànda anyi cikansanga wàbwelà muntwamu bwà kufikisha mpaasàtà mukwàte ne byà luse awu, ku diipaciibwa mu èkèleeziyà.

²³⁷ Tùngunuka, mpaasàtà. Nzambi àkubènèshè. Shààla wèwè ànu ne Díyi. Kwàngaci cintu nànsha cimwè.

²³⁸ Wàkabànda mu Dyulu. CyàkenzàYe ncinyi? Wàkakòsa disosò, ciibi, bwà, disambila dyà Dimiinu dyà Abraham edi. Bwà cinyi? Bwà cinyi? Twètù biikàle Mubidi wa Kìlistò, twètù bafwè, tudì tudibala twètù biinè bafwè ne bajjiikiibwe mu Kìlistò, ne

babiishiiibwe Nendè ku lufù mu dibiiikà dyà ku lufù. Yèyè ùdi Mutù wa Mubidi. Mwaba ùdi Mutù awu, Mubidi wùdi naaWù. Nènku díbà adi, mu dindà emu, mwaba ùdi ewu yònsò udi mwenze aci, “mmusòmbe Nendè mu myaba ya mu dyulu,” ne Dimiinuu dyà Bukalenge. Nzambi àtumbè.

²³⁹ Kakwèna biibi nànsha. Kwènà mwà kusambila ntàntà bule *nùnkù*, kadi kwamba ne: “Kaa, kaa, bwa *edi* dìyì.” Huh-uh. Bàdi bakwinjidila, ànu pòpò apu.

²⁴⁰ Kàdi mwoyi wètù wòwò kawùyì ùtùpiisha to; bu twètù bamanyè ne tudi twenda mu mèyì matùma à Nzambi; tudi tumòna nsòmbelu yètù mikezula kezukezu; tudi tucimòna; Dìyì dyònsò divwà Nzambi mutùme, tudi tuDilama; díbà adi biibi byònsò byà mwena lukuna mbikwàciibwe. “Dìbà adi lòmbaayi cyònsò cinùdi baswè, nebànwenzèlèci.” “Yèyè neàkwate ciibi cyà mwena lukunà wendè.” Kaa, mwanèètù, neciikale èkèleeziyà wa mùshindù kaayi’s wè!

²⁴¹ Pàngààlukilà cyàkàbìdi ku Phoenix, bu Mukalenge mwà kunganyishila, ndi ntèkemena ne, pangààbwelà mu tabernacle emu, ne bibàsa binefuke ebi nebiikalè byèdiibwe mulongo, ne cibàsa ne cibàsa cinefuke cyònsò mu nkwaka wa Èvànjeeliyò mu kabujimà mu cimenga eci neciikale ne mulongo wà bansantu bàà Nzambi udi ne mwoyi: ne mmwenekelu wa beena Kilistò; bààkula bu beena Kilistò; bènza maaluu bu beena Kilistò; biikalè ne Nyumà wa Nzambi ùkwàta mudimu munkaci mwàbò, mwaba awu, bu muntu mwà kwenza mpèkaatù, Nyumà Mwimpè ùcyèla patòoke ànu pa díbà adi.

²⁴² Neàcyenze. Nukàadi bacimòne mu mulongo wà babèèdi, too ne ku cyoshelu eku. Mùtùci, cyàmba ne: “Wèwè alùkila kwàka ukalongolole bwalu abu ne bàyeebè. Nda, kambilà mukàjèèbè ne uvwa mupàtùke, dilòòlò dyà màyipi, ne mukàjì kampànda, basòmba pa mwaba *kampànda*.” PiikalàCi mwà kucyenzà apa, mu dyendela dyà mu Dìyì, mu ditèèleja dyà Dìyì dikesè ditalàle adi, neCicyenzè munda mwèbè. Wèwè udi Dimiinuu dyà Abraham. Díbà adi, kakùyì mpèkaatù nànsha umwe.

²⁴³ Muiishi, kwènàku muswè kumòna aci mu èkèleeziyà webè anyi? Ubwela mu èkèleeziyà emu, utàngila mwònsò *emu*, umòna bònsò ne balùme ne bakàjì, biikale ne difwànà dyà Nzambi, bàà cijila, basòmbe ànu mwaba awu bùle tente ne bukole bwà Nzambi. Mpèkaatù kàvwa mwà kubwelamu to. Muntu ùbwelamù ne ùsòmba panshi, Nyumà ùjuuka wàmba ne: “John Jones, udi ùfùmìna mwaba *kampànda*, mu cimenga kampànda, mu mwaba *kampànda*. Ùdi kaaba aka bwà kupeta dyondopiibwa bwà mubidi wèndè. Nwamònu anyi? Wàkenza cintu *kampànda* pa mwaba *kampànda*. Wàkenza *cikampànda*, wàkangata, ùdi ne cyà kwaluja *cikampànda*, kulongolola *cikansanga*, díbà adi Nzambi neàmondòpe ku kansèrè aku. EMU MMÜDÌ MUKALENGE WÀMBA.” Èkèlekèle, èkèlekèle!

244 Mpèèshaayi èkèleeziyà kampànda, mpèèshaayi bantu dikumi, buwùji- . . . , bilengà bilelèlè byà Nzambi, Dimiinu dyà Bukalenge, tèèkaayi bantu abu kaaba kàmwè, kàdi nùmonè cyènzekà. Mpèèshaayibi bantu bàà mùshindù awu bùngi bùdi mu kazùbu aka ebu, kàdi nènnumèejè Bukenke bwikalà bàà pa buloba ne cyà kunyemenakù. Mmwómò. Ki cidi Nzambi muswè bwà twètù kwikalà ncyôci aci. “Wèwè udi cimenga cisòmbèle pa kakùnà.” Wèwè udi Dimiinu dyà Bukalenge dyà Abraham. “Nedikòokeshè ciibi cyà mwena lukunà wadi.”

245 Disaamà, kùdi cidi cilelè disaamà. Kùdi cidi cilelè bintu ebi. Nènku Nzambi, Nyumà Mwimpè, ùdi kaaba aka bwà kusokolola cintu aci ne kunwàmbila bwà cinyi kanwèna nucyùmvwà to. Bwalu bùdi bìshi kutùdi? Kabyènà bikèngela twètù kudìkonka ne: “NeCicyenze anyi?” Cikaadi munkaci mwà kucyènza. Cinùdi nwenza ncinyi?

246 Tàngilàayi mupròfètà awu. Yèyè kàakatèeleja cipeepèlè cicolè cyà civuma ne: “Butùmbi kùdi Nzambi! Àlèluuyàh!”

247 Abi mbimpè. Mpindyewu, vùlukàayi ne, ncyèna mpiisha aci to. Ndi ntèkemena ne bantu bônso mbúmvwè aci. Muntu kampànda wàkamba ne: “Mwanèètù Branham kènà wìtabuuja kwamba kwà ne: ‘Butùmbi kùdi Nzambi! Àlèluuyàh!’ to” Èè, ntàngilaayi kuneeku mpindyewu. Ndi ngiatabuuja dyela dyà mbila, dyakula dyà mu myakulu, dija dyà maja mu Nyumà.

248 Kàdi, mwanèètù, paùdi upanga kuumvwà kaaDìyi kakesè kapolè kàà mukana kàà Dìyi aku, ki cintu cidi cikubàkula ncyôci aci. Ki cintu ncyôci aci.

249 Eliyà ùvwa mumanyè ne ditàbuluwa dyònsò adi òvwa munkaci mwà kutùngunuka pambèlù pàpa. Kàdi yèyè ùvwa . . . Kadyàkamukòka bwà yèyè kupàtuka kuya kùdidi nànsha. Kàdi pàakatèlejaye kaaDìyi kapolè kakesè kàà Nzambi aku, dîbà adi ki yèyè kukòkiibwa. E kubwikilaye cibwikilu mumpàla mwèndè, kupàtukayè. Bwà cinyi? Eliyà ùvwa Dimiinu dyà Abraham, wènda ùlonda Dìyi.

250 “Binwàshààlà munda Mwànyì ne Mèyi ànyì munda mwènu, dîbà adi lòmbaayi cinùdi baswè, nebànwenzèlèci.”

Twinyikaayi mitù yètù bwà katanci kakesè cyanàànà kàà disambila.

251 Kaa, èkèleeziyà, mùshindù mene, pàndi njikija kuyiisha mùshindù awu, mùshindù mene ùndi ndyùmvwà’s wè! Nyumà ùdi ùmuka kùndi, ne ntàngila panyimà, mmòna bantu bàdi bafwànyine bushùwà menemene kwela byanza mu bìbòmbi byàbò ne kwangata byàkudyà byà bânà bààbò balela, bwà kubimpèèsha mèmè ewu. Ndi mmòna bakàji batekète muneemu emu, pàmwàpa ne nsukì mîpì, cìdibo bafwànyine kwenza ncinyi? Mbàfwànyine kungenzela cyònsò cìdibo mwà kungenzela aci. Muntu musòmbè ne mukàji wa bwena awu, eku mèmè pàànyì ànu mumònàngàne ne dimusùnsùlula mùshindù awu ne Dìyi adi,

bimusaama ku mwoyi, kwondo kèndè kàà mwoyi kapòyòyonge, kàdi nànsha nànkù muntu awu mufwànyine kupàtuka mwaba ewu kwenza mudimu mukolè, ne kuntùmina byàdikumi byèndè. Mmwòmò's. Dìbà adi bìdi byènza ne ndyùmvwè bundù, pàndi ngàalukila mu mubidi dîbà adi, udi udyùmvwà ne: "Cîmvwà—cîmvwà ngàmba ncinyi?" Ncyèna ne meeji à kumutàpa ku mwoyi to, kî ng'aci to.

²⁵² Kàdi, kaa, mwanèètù, ne mwanèètù wa bakàji munanga wanyì ne mwanèètù wa balùme, piikalàbi ne aci n'Dìyi dyà Nzambì, ne eci ciikale Nyumà Wendè munkaci mwà kwenza ne Dìyi adi dyàngate mwoyi, bwènù nwènù, neciikalè cinyi ne Ditùkù dyà Cilumbulwidi? Ndi nteeta bwà kunulongolola bwà ditùkù adi. Bu nwènù mwà kuswà, bu nwènù mwà kuswà angàtaayi ànu Dìyi Dyèndè. Ní nkààdikù kacya muyiishè cintu kanà cyònsò cidi kaciyi Dìyi, kaciyi mulayi wà Nzambì, dîbà adi udi ne bukenji bwà kulwa kùndi. Kàdi aci n'Dìyi. Ne mbwalu ndi munùangè.

²⁵³ Kî ne mbwalu mèmè—mèmè ncyèna muswè bwà nwikalè mu bwàtù to. Kàdi mbwalu bwàtù kabwàkanùfikisha dyàmwàmwa to. Nenùpetakane ne njiwu, dìmwè dyà ku àdi panshì aa.

²⁵⁴ Bunùdi nààbò mbwà kulwa ku Cilumbulwidi. "Mupile ku kakesè mmupile ku byònsò." Ne paùdi mumanye ne cintu kampànda ncîmpè bwà kucyènza, ne n'Dìyi dyà Nzambì ne mulayi bwà kucyènza, pashiishe kùyi ucyènza to, dîbà adi udi wamba bishi bwàci? Nebàkukonke bwà wèwè kufila kabingila, ciwènza ncinyi dîbà adi? Piikalà Mukenji ewu mu dindà emu ne cyà kukùngamangana neebè dyàmwàmwa ku cimwènyi, ku Ditùkù dyà Cilumbulwidi, ambààku tũng? Anji elààyibi meeji bwà bwalu abu, nwènù balundà bàanyi. Udi mwà kufwà kumpàlà kwà ditùkù kujikadi. Twètù bònsò. Nènku cintu cìmwèpelè cyà bushùwà ncyà ne, neùfwè.

²⁵⁵ Mvwa mwimàne dîngà ditùkù mutàngile maamù wanyì, mèmè mumukwàte ku dibòko dyànyi. Mvwa mukwàte taatù kumpàla kakesè kwà cyòci aci, ne mumutàngile ùya.

²⁵⁶ Nkààdiku mumòne bantu bènda bàpweka batàngile ku ndekeelu wa njila, bàvwà bèela meeji ne bàvwà bulelèlè menemene babinge. Wàmba ne: "Kaa, Mwanèètù Branham, kaa, bu mèmè ànu mwà kwikalaku ne mwoyi ndambù!" Dìbà adi dîbà dimana kupita. Ne vùlukà ne, lufù kalùtu lùshintulula musùkà to, lùdi lùshintulula ànu cisòmbelu cyàwù. Nènku wèwè mumòne cintu kampànda munda mwèbè, eela meeji bìmpè mpindyewu, pawikalà mumòne ne cintu kampànda munda mwèbè amu cidi cikwenzeja maalù mùshindù awu ne udyùmvwà mùshindù awu, mùvwà kùyi ne cyà kudyumvwà to, nyingàlàlà mu dindà emu. Udikù mwà kunyingalala anyi, mulundà wanyì? Lwàku. Ikàlà . . . Kabyèna bikèngela bwà wèwè kwikalà mùshindù awu to. Wèwè udi muntu mwena dikènga. Ikàlà ne nsòmbelu wa

Dimiinu dyà Bukalenge dilelèlè. Nzambi ùdi neebè dijinga leelù ewu.

²⁵⁷ Udikù mwà kwela cyanza cyèbè muulu, pàdi mutù wèbè mwinyika apa, ne mwoyi. Kwamba ne: “Mwanèètù Branham, ndi mwelè cyanza muulu kùdi Nzambi. Ne meeji matòòke ònsò, ùmukila mu mwoyi wànyì, ki cìndi muswè kwikala aci. Ki cìndi muswè kwikala ncyòci aci bulelèlè. Ndi—ndi mu cibwejàkàji kaaba aka ne bikwàbò byònsò, kàdi ncyà bushùwà ne ncyèna—ncyèna muswè kwikala mùshindù awu to. Ndi muswè kwikala cyúvwà munkaci mwà kwamba mu dindà emu aci. Nsambidilèku, Mwanèètù Branham. Nyewù mbàdisha byanza byànyì kùdi Nzambi, kí kùdi wèwè to, Mwanèètù Branham, kàdi nkùdi Nzambi. Ne mu mwoyi wànyì, Yèyè mmumanyè mwoyi wànyì, Ndi njinga bwà kwikala mwena Kilistò wa mùshindù ùdi wakula awu, Dimiinu dyà Bukalenge dyà Abraham, ku Yesù Kilistò.” Ela cyanza cyèbè muulu mpindyewu wámbe ne: “Mémè...Nsambidilèku, Mwanèètù Branham.” Nzambi àkubènèshè. Nzambi àkubènèshè. Ncyà bushùwà ne Yèyè neàkwenzèlèci.

²⁵⁸ Taatù wetù wa mu Dyulu, mu Bukènkè bwà Dìyì Dyèbè, mu bukolè bwà dibìikà Dyèbè dyà ku lufù! Ne ndi mumanya, Mukalenge, ne bantu bàdi bakwàte byà luse misangu yàbúngì bàtu bàkondakanangana mwab’ewu, mu bintu bishiilèshiiilàngàne...Bantu bàtu bapange too ne cyà kwenza; ewu ùlwa, wàmba cintu kampànda; ne ewu ùlwa, wàmba cikwàbò.

²⁵⁹ Ne munu mu Phoenix emu, cimenga cinène cyà—cyà, èè, babandidi eci, mùdi bintu byònsò byà mu ditunga dijimà edi bitùùdila, ne mu mubidi ne mu nyumà. Mwimàne pa mukunà, ditùkù adi, ne ngèla meeji mùdi misangu yàbúngì Dìnà dyà Nzambi ditèediibwa citèèlâtèèlè munda mwà ditùkù muneemu, mmasandi búngì kaayì àdi endiibwa, mbúngì kaayì bwà mpèkaatù ne bukooya bìdi mu misèèsù muneemu emu, ne nzùbu yà binwinyì byà maalà ne bayi bàà mu nzùbu yà binwinyì byà maalà, ne byònsò, bààbúngì bàà kùdìbo bàmba mùdìbo beena kwitabuuja, beena Kilistò!

²⁶⁰ Bakàji bènda bàpweka ne mùsèèsù, ne mucì wà mfwankà mu byanza byàbò. Bèndakana ne bilàmbà bìdi bisalulangana masandi, pèèbè Wèwè mwambe ne bìdi binunka bibì kumpàla Kwèbè, “Ncinyangu,” bu cisùkwidi cyà mènýi cyà kale, cyà bukooyà, cyà manyaanù, cìnunka mwaba kampànda. Èyì Nzambi, mmunyì mùdi mukàji kampànda udi udyàmba mùdiye ne Nyumà Mwímpe mwà kwenza cintu cyà mùshindù bu nàнку, kàdi mumanyè ne mu dyùlù dyà Musùngidi, bìdi binunka mùshindù awu, mupùyà mubi? Mmunyì mùvwàYe mufwànyìne kwikala ne cintu bu nàнку mu Bukalenge Bwèndè? Taatù, bìikalapù nànsha bamanyè, ne bàdi kule naaBu mu ntàntà wà kilomèetà mùliyo mujimà.

261 Ndi ndòmba, Nzambi, ikàlàku ne luse. Muntu nànsha umwe kí mmuswè kuya mu myaba yà bajimine ayi to. Muntu nànsha umwe kí mmuswè kupweka muntwamu to, Taatù. Aci cyàyla kule bwà wètù nànsha umwe uyamù. Pààbi munda amu kùdi mwoyi mwìmpè munda mwà muntu awu, mulùme awu, anyi mukàji awu, mulùme anyi mukàji mwena luse ne mulengele ne wa kalolo, kàdi uvwa ànu museeswishiiabwe kùdi dyabulù. Dyabulù ngudi mwenze cyòci aci.

262 Sàtaanà, ndi nkulwisha, bwalu wèwè udi mwena lukunà wa Mukalenge wanyi. Wèwè udi mwena lukunà wa Dìyi Dyèndè. Ne ndi nkutùmina dīyi, ku Yesù Kilstò, Mwànà wa Nzambi, bu muntu wa cifwàkà, mumanyè ne ncyèna ne bukolè mu mèmè mwinè to. Mèmè ncyèna ne bukolè bwà kukezula naabò nànsha umwe wa ku bakàji aba, anyi wa ku balùme aba, udi munkaci mwà kutèeleja mukàbà wà mèyi ewu, anyi—anyi ní mpenyi pwònsò to. Ncyèna ne mùshindù wà kubàkezula to. Ndi mupuyile. Kàdi ndi ne bukòokeshi bwà Dìyi dyà Nzambi, bu musadidi, bwà kuDìyiisha, ne mwenzèjiabwe bwà kukwàta mudimu ku bukòokeshi abu. Nànsha mpùlushi udi pambèlu apa kènà ne bukolè bwà kwimanyika kàshinyi kampànda to, kàdi udi ne bukòokeshi bwà kucyèna.

263 Nèku, Sàtaanà, mbipìciibwa ne wèwè mubanga kudidisha freins yèbè, bwalu ndi nkutùmina dīyi, ku Yesù Kilstò, bwà wèwè kulekelela bantu aba, pa buloba bujima, mwaba wònsò ùdi Mukenji ewu mwà kuya. Bàlekèlèlè. Ndi mbànana, bwà ne mbàsumbiabwe. Kabèena ku bukòokeshi bwàbò bòbò biinè to. Mbasumbiabwe ku mushinga, bòbò ki Dimiinu dyà Bukalenge dyà Abraham, Mukalenge Yesù.

264 Wèwè mwene lubombo mukooya, wa manyaanù, wa mupùyà mubolè, museeswishi wa bantu, wenda ubàlombola mu bufofo ukabàbweja mu biina byà iferno, bàlekèlèlè. Ndi nkutùmina dīyi, ku Nzambi udi ne mwoyi, ku Mulàmbù wà Mwan'Èndè, Yesù, bwà wèwè kubàlekèlela, bwà misùùkà yàbò yikalè myùle tente ne dibènesha Dyèndè ne Bwikadi Bwèndè, bwà bààmònakù mwà kukòokeshi ciibi cyà mwena lukunà yònsò. [Katùpà kàà mukàbà wa mèyi munda mutupù—Muf.] Udi mubenzeje bwa kushàalabo bindile *cikampànda*, *cikansanga*, anyi *cikankènga*, anyi ndengèlù kampànda wa cijila, anyi cingà cintu, kàdi ndi ngàmba ne newùjimijè dibàkwàta dyèbè adi.

265 Mmunyi mùvwà disaamà mwà kutwà nkànàna mu dilaabiibwa bu edi? Ànu pàdìbo bàbènga bwà kutàngila dyàmwàmwà ku mulayi mwàkenzà taatù Abraham, pàvwàye mwà kuMumòna mu cimfwànyi nkàmà ne nkàmà yà bidimu kumpàla, wenda ùlwa.

266 Balekèlèlè. Mu Dìna dyà Yesù Kilstò, lekèla bantu abu bàye.

267 Swâku bwà bukole bwà Nzambi, dyumvwa dyà Dîyi, bu mùdibo basukùdiibwe mu dindà emu ku Dyôdi adi, dyumvwa dyà dilama dyà Dîyi dyà Nzambi ne milayi Yèndè biikale bilelèlè, nshindameenu udi kâyi mwà kushimbudiibwa kùdi Sâtaanà to. Swâku bwà muntu ne muntu àkwâte ku mulayi awu, wamba ne: “Eci ki Cyôci. Ndi muDikwâte. Nzambi ngudi mufile mulayi. Mémè ndi dimiinu dyà Abraham. Mmunyi mûndiku mwà kwela mulayi Wèndè mpatâ?” Ne kutûngunuka ànu ne lwendu, ku Yesù Kilistò, Mukalenge wetù. Amen.

Ndi muMunange . . .

268 Bivwa byà bitâpa be mu dindà emu, balunda bàanyi. Tûkuukwilâayi mpindyewu mu kalolo.

Bwalu Yèyè wàkannanga kumpâla
Ne wàkampetela lupàndù
Pa mucì wà Kâlvariyo.

269 Bivwa mwà kwenzeka anyi, kî ndipangila dyà cijila to, cyà bushùwà menemene kabyèna nàнку to. . . Eci ncyà—ncyà ntèndeleeu. Twèlàayi byanza muulu kùdi Yèyè utùdi banangè. Nènku twámbe ne:

Ndi muMunange, ndi muMunange
Bwalu Yèyè wàkannanga kumpâla
Ne wàkampetela lupàndù
Pa mucì wà Kâlvariyo.

270 Mpindyewu kùdi mukâji yònsò anyi mwânà wa bakâji udi mwab'ewu, ki cyanza cyanyi eci. Nzambi mmukunange. Kùdi mulùme yònsò anyi mwânà wa balùme udi mwab'ewu, Nzambi mmukunange. Ndi munûnangè. Mpindyewu, ncyèna mwà kolola cyanza bwà kukwâta cyònsò cyà byanza byènu abi to, kâdi Nzambi ànumvwijèku cîndi njinga kwamba. Patùdi tuwimba kabìdi apu, kùdimukâayi ànu cyanàànà nûlabulanganâayi ku cyanza ne muntu kampânda. “Ku eci ki kwàmanyina bantu bònsò ne nudi bayiidi Bàanyi, mpanùdi ne dinanga, muntu ne mukwèndè.”

Ndi . . .

. . . wàkampetela lupàndù
Pa mucì wà Kâlvariyo.


Ndi muMunange, ndi muMunange
Bwalu Yèyè wàkannanga kumpâla
Ne wàkampetela lupàndù
Pa mucì wà Kâlvariyo.

271 Kanwènaayikù baMunangè anyi? Njiyà yà kalolo yà Nyumà Mwimpè ayi! Dîyi njila wa dikezula, dikupeluja, dikuvwiija cifûkiibwà cipyacipyà, dyùmusha byònsò. Dîyi nditwè ngwengwengwe kutâmba mwelè wa mvità wa nseke yibidi, ditengula, dikòsa dyumusha bintu byònsò byà pa buloba. Nwamònu anyi? Dìbà adi tudi tudyumvwa bakezùke, bapeluja,

tuMwitaba ne tuMwitabuuja. Ke mùshindù utùdì mwà kwimba ne:

Ndi muMunange, ndi muMunange
Bwalu Yèyè wàkannanga kumpàla
Ne wàkampetela lupàndù
Ku Kàlvariyo.

²⁷² Kî mbilenga bilaya anyi? Ndi mucinangè ne mwoyi wanyi wonsò. Nwamònu anyi? Tùciteetaayi kàbìdì, bantu bõnsò mpindyewu, ànu menemene, ne dìyì dyènu dyõnsò mu katòngòbèlè mpindyewu.

Ndi muMunange, ndi muMunange
Bwalu Yèyè wàkannanga kumpàla
Ne wàkampetela lupàndù
Wa ku Kàlvariyo . . . 

62-0121M Ne Dimiinu Dyèbè Nedikwatè
Ciibi Cyà Mwena Lukunà Wadi
Faith Tabernacle
Phoenix, Arizona États-Unis

CILUBA

©2024 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Dîyì dya bwena-cintu

Makenji ònsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiyi bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyì wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org